

# Id ash d Paul O'ohana am ha Wui g Rome t Am Wohochuddam

---

**1** Ni-wepnag mam am Rome t am d kihkam:

Am ant wo i em-o'ohani g s-kehg ha'ichu ahgaj g Jiosh ahni Paul mani d piongaj g Jesus Christ. Jiosh at ab i ni-waid k am i ni-kei mant id wo ahgachugad.

<sup>2</sup>K d ihda ha'ichu ahgaj matki g kekelibad Jiosh ha'ichu i tashogiddam an o'oha matsh wa g Jiosh ab wo i wuhshad. <sup>3</sup>K ihda ha'ichu ahgaj am t-tashogid hegai mo d alidaj ch d ge'e t-kownalig Jesus Christ. Id atsh ia mahsi jewed dahm k ab d amjedkamaj g kownalibad David. K heg hekaj tasho mo woho d hemajkam.

<sup>4</sup>Kutsh g Jiosh ab i wuhshad g Jesus Christ muhkig amjed am i dahm matsh e muhkid k hab masma ab t-chehgidch mo d alidaj ch d hekia s-ap'ekam <sup>5</sup>Kut wa ab si i s-ni-ho'ige'el g Jesus Christ k am i ni-kei am wehhejed g Jiosh mantsh am wo i ha ahgidahi g nahnko mahs hemajkam g s-kehg ha'ichu ahgaj. Kutsh mu'ijj ab wo s-wohochud k ab wo s-wohoch elidad. <sup>6-7</sup>Ni am wa kah mamtsh ha'i ahpim Rome t am hemajkam ab i s-wohoch. Jiosh o ab si em-tatchua ch ab i em-waid k am

hab em-juh mamt ab i s-wohoch g Jesus Christ k d Jiosh hemajkamga. Kunt heg hekaj am wo ha'ichu i em-o'ohani.

Ab o wa si s-em-ho'ige'id g t-ohg Jiosh g t-kownalig Jesus Christ wehm ch ab wo wa ba'ich i em-mahkad g i wehmtadag ch s-ap tahhadkam.

## Id o d Paul ho'ige'idahun am ha wehhejed

<sup>8</sup>Wehsko o am e a'aga mamtsh ab i s-wohoch g Jesus Christ. Ni heg hekaj ab si ho'ige'id g Jiosh. <sup>9-10</sup>Wehs ni-ihbdag amjed ani chikpanid g Jiosh am ahgachugch g s-kehg ha'ichu ahgaj ab amjed g alidaj. K g Jiosh s-mahch mani chum hekid ab wui ni-ho'ige'idahun am em-wehhejed. <sup>11</sup>S-em-neidamk ani ch ab tahni g Jiosh matp hems am wo ap'ech mant am wo i em-chehgm k wo i em-wehmt em-wohochudadag ed mamt hekaj am wo i e gewpkai. <sup>12</sup>Ab att a'ai wo i t-wehmt ab a'ai kahk g t-wohochudadag.

<sup>13</sup>Am g wo s-mahchk mani mu'ikko am a'ap'echud mant am wo i em-chehgm. K wabshaba

am ha'ichu has e wua mani heg hekaj pi ni-nankog. Si ani tatchua mant am wo i em-wehmt am em-ahgidch g Jiosh ha'ichu ahga hab masma mani i ha wehmaj hegam mo hahasko kihdag ch hab wa'ap pi d Tutuligo. <sup>14</sup>Ab o ni-chehani g Jiosh mant wo ha ahgi g wehs nahnko mahs hemajkam ihda s-kehg ha'ichu ahgaj, chum wa hems hegam mo pi chu a'amichud ch hegam mo d mischini. <sup>15</sup>Ni heg hekaj ni-nahtokch mant am epai wo i em-ahgidahi ahvim mam am kih Rome t am.

**Mo si s-gewkdag g Jiosh ha'ichu ahga**

<sup>16</sup>Wehs at wo ha do'ibia g Jiosh hegam mat ab wo i s-wohoch ihda s-kehg ha'ichu ahga ab amjed g Jesus Christ. Kuni heg hekaj wabsh si s-ap ni-tahtk ch am ahgachug. Tutuligo at wehpeg ab bei e-ap'edag mat wo e do'ibia k g gawul mahs hemajkam ab hahawa bei. <sup>17</sup>Jiosh ha'ichu ahga o am t-tashogidch mat hedai g Jiosh am wo i ap'ech e wehhejed. An o o'ohadag:

Am at wo i ha ap'ech g Jiosh e wehhejed hegam mat ab wo i s-wohoch g ha'ichu ahgaj.  
Kut hegam wo wa'i bei g pi ha huhugedam doakag.

*Habakkuk 2:4*

**Wehs hemajkam o edgid g chu'ijig**

<sup>18-19</sup>Ab o t-wui i e tashogid g Jiosh. K wabshaba mu'i hemajkam gam hu hab i juhkch ch hab junihim g pi ap'ekam. K ihda pi ap'ekam an kuhpahim mat wo s-e mai g wohokam. T g Jiosh heg hekaj s-ko'okam wo ha namkid.

<sup>20</sup>Tt wo chum s-mahchk mo has chu'ig g Jiosh am neidch g nahtoi no pi id am chum t-tashogid mo g Jiosh wehs ha'ichu dahm hab chu'ig ch wehs edgid g gewkdag chum hekid. Kut hemho wa ab wo moht g e-chu'ijig matp hedai pi wo mahchim.

<sup>21</sup>Neh, wehs hemajkam o wa chum s-mahch mo an hema d Jiosh ch wabsh pi ab hu mahkch g has elidadag. Ab o s-ha ho'ige'id. K wabshaba pi ab hu i ho'ige'elid ch wabsh pehegi ha'ichu chegito. K am wabsh i s-chuhugam g ha-chegitoidag. <sup>22</sup>Bo e ahg mo s-chu a'amichud ch eda pi ha'ichu mahch. <sup>23-26</sup>Jiosh o d pi ha huhugedam ch d si ha'ichu. Kutt heg ab wo wa'i chum ihmud mo d t-Jioshga. K wabshaba idam im hu hab wabsh juhkch ch wabsh ha'ichu jijoshchud ch ab ha ihm. K eda d wabsh hemajkam ha-nahtoi mo ha o'odhamt o atp hems ha ha'ichu doakamt. T hekaj g Jiosh am wabsh i ha dagito mat hab wo juh hegai mo haschu hab s-junimk. Kuki hab wua g s-uam ha'ichu ch s-ta edam ha'ichu. U'uwi o ha'i chum hems pi ha kuhkunt ch e wehm hab wua g s-ta edam ha'ichu. <sup>27</sup>K g chechoj pi ha hohont ch e wehm hab wa'ap wua g s-ta edam ha'ichu. Kut heg hekaj wo si s-ko'okam ha namkid g Jiosh.

<sup>28</sup>Pi o tatchua idam mas wo s-mahchk g Jiosh. T g Jiosh heg hekaj am wabsh i ha dagito pi kehg ha-chegitoidag ed. K am hab wua hegai mat haschu pi am hu hab wo chum wuad. <sup>29</sup>Ab at wabsh i si ha shuhd g nahnko mahs pi ap'ekam

mo ha'i si pihk e elid g s-kaisdagkaj ch ha'i s-ta kek'eidama o s-chu hehgamk o s-ha mu'amk o s-chu cheggiamk o s-chu i'attomk o s-chu padhog eh'elidamk o s-chu ahgamk. <sup>30</sup>Ha'i o s-ko'okam has e ahg o s-ta ko'okdama o chum si e hahaschud o si i e nakog mat am ba'ich hab wo i juh g pi ap'ekam o pi ab hu wohog ha elid g e-ge'egedga <sup>31</sup>o s-u'ama. Ha'i o pi hab wua hegai mo haschu hab kaj mat hab wo juh o pi hedai pihk elid o pi ab hu ha ho'ige'id no pi s-keh'id g Jiosh. <sup>32</sup>Jiosh chehanig o hab chu'ig mat hema hab wo masmak ch ab wo nako g s-ko'ok e-namkidadag. K idam am wa chum s-mahch ihda ch eda am hab wa masma hab e junihim ch wabsh s-hohho'id mo ha'ijj am hab wa'ap e junihim.

**Matsh s-ko'okam wo ha namkid g Jiosh g pi ap chu'ijkam**

**2** Na'ams ha'ijj ahpim hab kaj "Hah, sho'o wa'i si pi ap d hehemajkam hegam map am ha a'aga k ch hemho wa wo bei g s-ko'ok e-namkidadag," ch amtp eda hems hab wa'ap junihim ihda. Neh, m wabsh hejel e-ne'okikaj ab e mohto'id g s-ko'ok e-namkidadag. <sup>2</sup>S-mahch ach mo d wabsh i si shel mat wo ha lodai g Jiosh hegam mo hab wua hegai mani am em-ahgid. <sup>3</sup>Kumt ahpim hemho wa hab wa'ap wo bei g s-ko'ok e-namkidadag mamtp am hab wo junihid ihda. <sup>4</sup>Idani o wabsh ab si s-t-bahbgi g Jiosh ch s-hemajim ab t-nenida no pi tatchua matt gam hu wo s-ohhod g pi ap t-chegitoi. <sup>5</sup>K wabshaba mu'ijj pi ab hu kaimk g Jiosh ch

pi sha'i pihk e elid hehaj. Idam o ba'ich i ge'e ab e mohto'idahim hegai s-ko'ok namkidadag mat wo nam ge'e lodaita tash ch ed. <sup>6</sup>Heg at i tash ed wo t-namkid g Jiosh heg hehaj mach haschu hab i junihim. <sup>7</sup>Heg att wo cheh mach haschu i gahg. Am g hab wo junihid g s-ap'ekam ch wo e gahgidag g Jiosh ap'echuda. T g Jiosh am wo i em-wahpki e-kihdag ed mamt chum hekid an wo wehmajk.

<sup>8</sup>Mu'i hemajkam o wabsh hejel e tatchua ch hab junihim g pi ap'ekam. T idam g Jiosh ab wo ha mah g s-ko'ok ha-namkidadag. <sup>9</sup>Kut ab wo tahtkkad g sho'igdag ch s-ko'ok, wahm g Tutuligo matp pi hab hu wo kaiha hegai mo haschu t-nuhkudachud g Jiosh. <sup>10</sup>T g Jiosh ab wo si t-ha'ichuch ahchim mach hab junihim g s-ap'ekam k ab wo t-mah g has elidadag ch s-ap tahhadkam. Ahchim Tutuligo att wehpeg bei ihda s-ap'ekam. Mt wabshaba ahpim gawul mahs hemajkam ab hahawa bei. <sup>11</sup>Jiosh o wehs t-wepo ab t-neid ch wehs t-wepo s-t-do'ibiamk.

<sup>12</sup>Gawul mahs hemajkam o pi hehaj g Moses chehanig ch wabshaba s-mahch mo haschu d s-ap'ekam ch wo e lodai heg hehaj mo pi hab junihim g s-ap'ekam. K g Tutuligo s-mahch heg hehaj chehanig mo haschu d s-ap'ekam ch heg hehaj hab wa'ap wo e lodai mo pi am hu hab junihim. <sup>13</sup>Pi at hedai wo i ha ap'ech g Jiosh heg wabsh hehaj mo kah g chehanig k washaba heg hehaj mat heg am hab wo junihid. <sup>14</sup>Heki o hu pi edgid g Jiosh chehanig g gawul

mahs hemajkam ch eda s-mahch mo haschu d s-ap'ekam. K g ha-mahchig d ha-chehanig. K g ha-mahchig d ha-chehanig. <sup>15</sup>K am wa tasho mo wa hab chu'ig no pi e kudut mo hekid hab wua g pi ap'ekam ch s-ap e tahtk mo hekid hab wua g s-ap'ekam. <sup>16</sup>Kut hab wa'ap wo e juh heg eda tash mat kei g Jiosh mat g Jesus Christ wo ha lodai g ha-chu'ijigkaj, chum hems g pi ap ha-chegitoidag. Neh, bo chu'ig ihda s-kehg ha'ichu ahgaj g Jiosh mani ahgachug.

**Mo g Tutuligo edgid g  
Jiosh chehanig**

<sup>17-18</sup>Mu'ijj g ni-wehm Tutuligo o hab e elid mo s-ap s-mahch g Jiosh tatchui ch am hab junihim g s-ap'ekam no pi edgid g chehanigaj. <sup>19</sup>Bo e elid mo d ha wanimeddam ch ab ha mahkch g tonlig hegama mo pi edgid g Jiosh chehanig. <sup>20</sup>Bo e elid mo wehs ab u'ukch g amichudadag ch wohokam no pi ab u'ukch hegai chehanig. Chum o wa ha mashcham g pi ha'ichu mahchim ch a'al <sup>21</sup>k ch eda pi hejel am hu hab wua g e-mashchama. Ha'ijj o ha mihsamad mat pi hedai ha'ichu wo ha ehsidad <sup>22</sup>ch pi wo ha wehm wo'iwua hegai mo pi d ha-wehm kihhim ch eda hejel hab masma hab e wua. Si o pi hohho'id mat ab wo ihmada g hemajkam nahtoi k ch eda wo ha ehs mo haschu an hab chu'ig ha-cheopi ed. <sup>23</sup>Ab o chum si e hahai'ichuchud mo edgid g Jiosh chehanig ch eda mu'ikko pi am hu hab junihim ch ab mamka g Jiosh g si edadag. <sup>24</sup>An o hab chu'ig Jiosh o'ohana ed:

Gawul mahs hemajkam o s-ko'okam has ahg g Jiosh ha hekaj g Tutuligo. *Ezekiel 36:20*  
<sup>25</sup>Do si ha'ichu g pahl hikuchka em-wehhejed mamtp ab wo wohog elidad g chehanig. Mtp wabshaba pi ab hu wo wohog elidad, k pi has d sha'i ahga g pahl hikuchka. <sup>26</sup>Matp hema ab wo sha wohog elidad g Jiosh chehanig, t g Jiosh hab masma ab wo neidad mo pahl hikuchkas, chum as pi d Tuhligo ch pi woho hikuchkas. <sup>27</sup>Gawul mahs hemajkam o pi pahl hikuchkas ch eda ha'i hab e junihim mo hab masma hab chu'ig g chehanig. Kut heg hekaj ab wo e chu'ijigch g Tutuligo no pi edgid g chehanig ch eda melichkwuhim.

<sup>28</sup>Pi o d Jiosh hemajkamga hegama mat wabsh gawul juh g e-chuhkug g pahl hikuchkakaj. <sup>29</sup>Hegama o hi d Jiosh hemajkamga mat gawul juh g e-ihbdag. Kut pi wo e nako mas g chehanigkaj hab wo juh ihda. Hekia S-ap'ekam Gewkdag at hemho wo wa gawul juh g t-ihbdag. Tp hems ab wo em-hehgchul g hemajkam mamt gawul wo juh g e-chuhkug. T wabshaba g Jiosh ab wo em-hehgchul mat gawul wo e juh g em-ihbdag.

**3** Pegih, mtp hems a ha'ijj hab wo chei, "Pi oki ha'ichu d sha'i ha-ap'edag g Tutuligo ha dahm g gawul mahs hemajkam." <sup>2</sup>Nt wabshaba wo em-ahgi mo mu'i ha'ichu d t-ap'edag. Hema o d ihda mat g Jiosh ab t-hiwigi g ha'ichu e-ahga matt wo ha ahgi g nahnko mahs hemajkam.

<sup>3</sup>K hi wa chum woho mo ha'ijj g ni-wehm o'odham pi ab hu wohog

elid g ha'ichu ahgaj. T wabshaba g Jiosh wo ho am hab wo juh hegai mo has i kaij. <sup>4</sup>Chum o hekid ahg g wohokam, chum as wehs hemajkam g iattogi hab wua. Neh, bo chu'ig an Jiosh o'ohana ed:

Jiosh ha'ichu ahga o d hekia wohokam, chum as ha'ijj hab kaij mo pi wo ho. *Psalm 51:4*

<sup>5</sup>Ha'ijj o hab kaij, M o wa s-ap'e matt hab wo junihid g pi ap'ekam no pi heg hekaj tasho am chegid mo g Jiosh hab wua g s-ap'ekam. T heg hekaj pi ap hab wo e juh g Jiosh matp s-ko'okam wo t-namkid heg hekaj. Neh, bo kaij. <sup>6</sup>Nt wabshaba wo em-ahgi mo ahg g iattogi. Jiosh o chum hekid hab wua g s-ap'ekam. Pi at has masma wo e nako mat wo t-lodai matp d wo pi ap'ekamk.

<sup>7</sup>K hab kaij idam, T-iattogi o am tashogid mo g Jiosh chum hekid ahg wohokam. Kuch heg hekaj am chegid mo he'es i ge'ej g Jiosh ha'ichu k ed. Pegih, k haschu ahgch hab kaij g Jiosh machs d pi ap chu'ijkam ch wo bei g s-ko'ok namkidadag. <sup>8</sup>Ha'ijj o an ha iattogid manish hab kaij matt am hab wo junihid g pi ap'ekam ch hab masma wo tashogi g s-ap'ekam. T wabshaba g Jiosh wo s-ko'okam ha namkid heg hekaj.

#### **Mash wehs hemajkam d pi ap'ekam**

<sup>9</sup>Neh, pi o sha'i ba'ich i s-ap'e g Tutuligo mo g gawul mahs hemajkam. Wehsijj ach wa ab mohto is g pi ap'ekam. K id an t-u'ukch. Kutt pi hedai wo sha'i t-nako machs pi hab wo junihid g pi ap'ekam. <sup>10</sup>An o hab chu'ig Jiosh o'ohana ed:

Pi o hedai o'odham d sha'i s-ap'ekam

<sup>11</sup>ch pi hedai amichud mo haschu d s-ap'ekam ch pi hedai mahchink g Jiosh.

*Psalm 14:2-3*

<sup>12</sup>Wehsijj at i e mehkod ab amjed g Jiosh k am hab junihim g pi ap'ekam.

Pi o hedai hab sha'i wua g s-ap'ekam.

Pi hedai.

<sup>13-14</sup>S-ko'okam o neneok hab masma mo s-em-mu'amk ch g iattogi hab kaij.

Pi kehg ha-ne'oki o hab masma i wuhshani mo g hialwui ab ko'oi amjed. *Psalm 6:9; 10:7*

<sup>15</sup>E o nahtokch mat s-ko'okam wo em-juh k wo em-mua.

<sup>16</sup>Chum o hebai gantan g sho'igdag ch padchud g s-ha-hehgig.

<sup>17</sup>Pi o hekid sha'i s-ap e tahtk.

*Isaiah 59:7-8*

<sup>18</sup>ch pi hekid ab has elid g Jiosh.

*Psalm 36:1*

<sup>19</sup>Jiosh at ab ba'ich wo i ha chu'ijjigch hegam mo edgid g chehanigaj ch pi am hu heg oidch hab e junihim. K hekaj hab mahs mo g Jiosh wehs ab ha abchud g hemajkam. <sup>20</sup>Pi at hedai wo e nako mas wehs am hab wo junihid g Jiosh chehanig ch hekaj wo i e ap'ech am Jiosh tahgio. Chehanigaj at am wo i t-tashogi mach haschu pi ap'ekam hab wua.

#### **Mo has masma ha ap'echud g hemajkam g Jiosh**

<sup>21</sup>Ia'i idani at am i tashogi g Jiosh mat has masma wo i ha ap'ech g hemajkam am e tahgio. Chehanig at pi wo sha'i t-ap'echud k wabshaba

heg wohokamchud mat has masma g Jiosh wo i t-ap'ech. K g kekelibad Jiosh ha'ichu i tashogiddam id hab wa'ap wohokamchud. <sup>22</sup>Jiosh at am wo i ha ap'ech hegam matp hedai ab wo i s-wohoch g ha'ichu ahgaj k ab wo hiwgad g Jesus Christ, chum as has mahs d wo hemajkamk.

<sup>23</sup>Wehs hemajkam at hab juh g pi ap'ekam k pi am hu ais g Jiosh hab elida. <sup>24</sup>K wabshaba g Jiosh ab i s-t-ho'ige'id. T g alidaj Jesus Christ ab moht g s-ko'ok t-namkidadag am t-wehhejed. T hekaj ab i t-ap'ech g Jiosh e wui. <sup>25</sup>Jiosh at am i ap'ech mat g alidaj wo e muhkid am t-wehhejed k hekaj gam hu hab wo i juh g pi ap t-chu'ijig mattp hedai ab wo i s-wohoch. Ab o wabsh s-ha ho'ige'id hegam heki hu hemajkam mo ab s-wohochud ch pi chegima g ha-chu'ijig <sup>26</sup>nat pi g alidaj wo e muhkid am wehs t-wehhejed. Bo wa masma am t-chehgidch g Jiosh mo chum hekid hab wua g s-ap'ekam ch wo e nako mat am wo i ha ap'ech g pi ap chu'ijkam mat hekid ab wo bei g Jesus nat pi heg ab moht g s-ko'ok t-namkidadag.

<sup>27-28</sup>Neh, k pi ha'ichu d sha'i hegai machs hekaj wo chum si t-haschudad. Pi att wo sha'i t-nako machs wo i t-ap'ech am Jiosh tahgio am hab junihidch g s-ap'ekam. Jiosh at am wo i t-ap'ech e wui matt hekid ab wo i s-wohoch g ha'ichu ahgaj. <sup>29</sup>Pi o hegam d wa'i ha-Jioshga mat ab ha mah g chehanig ch wabshaba wehs hemajkam d ha-Jioshga. <sup>30</sup>Ab o ha wehnad ch wepo masma ab ha neid g Tutuligo ch hegam mo pi d Tutuligo. Wehsijj at hab wa'i masma

wo i e ap'ech am Jiosh tahgio mat ab wo i s-wohoch g ha'ichu ahgaj ab amjed g Jesus. <sup>31</sup>Id o pi hab d ahga machs im hu hab i juh g Jiosh chehanig matt hekid ab i s-wohoch. T-wohochudadag o am i t-gewpkad matt am hab wo junihid g tatchuij mo hab wa chum d ahga g chehanigaj.

#### Ha'ichu i tashogida ab amjed g Abrahambad

**4** Am ant wo i wuhshad g Abrahambad mant am wo i em-tashogi ihda mani wa em-ahgid. Ihda Abrahambad ash d t-shohshon ahchim Tutuligo <sup>2</sup>ch ab i s-wohoch g Jiosh. Tsh g Jiosh heg hekaj am i ap'ech e tahgio. Pi atsh wa hejel am i e ap'ech heg hekaj mas hab junihim g s-ap'ekam. K heg hekaj wa pi am hu ha'ichu d sha'i hegai matsh wa heg hekaj wo chum si e haschudad g Abrahambad. <sup>3</sup>An o hab chu'ig Jiosh o'ohana ed:

Abrahambad at ab i s-wohoch g Jiosh.

T g Jiosh heg hekaj am i ap'ech e tahgio. *Genesis 15:6*

<sup>4</sup>Neh, do em-namkidadag hegai mamt wo ha gehg chikpank. <sup>5</sup>K wabshaba d em-mahkigdag hegai mamtp ab wo bei ab s-wohochudk hegai mo ab em-makiog. K g Jiosh hab kaij mat am wo i ha ap'ech e tahgio k gam hu hab wo i juh g pi ap ha-chu'ijig hegam mat ab wo i s-wohoch. Id o d Jiosh mahkigdag. <sup>6</sup>K id hab ahg g Davidbad ch hab kaij mo s-ap e tahtk hegam mat ab wo i s-wohoch g Jiosh nat pi am wo i ha ap'ech e tahgio. K hab masma an o'ohadag:

<sup>7-8</sup> Sho'o wa'i s-ap e tahtk hegam mat hedam g Jiosh gam hu hab i juh g pi ap ha-chu'ijig k pi ab hu wo ha mohto'i.

*Psalms 32:1-2*

<sup>9</sup> David o pi hegam hab wa'i ha ahg mo pahl hikuchkas ch wabshaba hegam hab ep ha ahg mo pi pahl hikuchkas. Heki ani hu ahg matsh g Abrahambad ab i s-wohoch g Jiosh. Sh g Jiosh heg hekaj hab kaj mo d s-ap'ekam. <sup>10</sup> Id at hab e juh mat koi e pahl hikuch g Abrahambad. <sup>11-12</sup> Ab ash wa s-wohochud g Jiosh. Sh g Jiosh heg hekaj hab kaj mo d s-ap'ekam. T heg i dahm am hahawa e pahl hikuch mat hab masma am wo wohokamch g e-wohochudadag mat heg hekaj am i ap'ech g Jiosh. T g Jiosh hab masma wehs am wo i ha ap'ech hegam mat hab wa'ap ab wo i s-wohoch, chum hems hegam mo pi pahl hikuchkas. Heg o wa wepo mach ahchim Jiosh wohochuddam wo ho d Abrahambad amjedkam nach pi hab masma ap'edag. Hemho wa att ab wo s-wohochudad ch ab wo hiwgad hab masma mash wa g Abrahambad.

**Matsh g Jiosh wohochuddam  
wo bei g ap'echudaj**

<sup>13</sup> Jiosh ah am ha ahgid g Abrahambad ch amjedkamaj matsh am wo i ha ap'ech e tahgio k wehs ab wo ha mah g jewed kahchki matp ab wo i s-wohoch. <sup>14</sup> Kut pi ha'ichu wehhejed wo s-kehgajk g ha-wohochudadag matp id hab wo sha ha juni g Jiosh hegam mo pi ab hu wohochud ch am hab wabsh junihim hegai mo an

o'ohanas chehanig ed. T g Jiosh d wo s-iattomkamk matp am hab wo sha ha juni. <sup>15</sup> Pi att ab hu wo sha'i i t-ap'ech g chehanigkaj k wabshaba heg hekaj ab wo t-abch g t-chu'ijig matt ab wo bei g s-ko'ok t-namkidadag. T hegam mo pi edgid pi heg hekaj ab hu wo e abch.

<sup>16</sup> Pi at ahchim am wa'i i t-ap'ech g Jiosh mach wa an u'ukch g heki hu chehanigaj. Ahpim at am ep i em-ap'ech mamt hab wa'ap ab i s-wohoch g ha'ichu ahgaj. Batt masma am oidk hab t-juh g Abrahambad k ab hiwig g Jiosh hemajimalig. Id o heg wa wepo mo g Abrahambad d t-ohg. K g Jiosh heg hekaj am t-chehgidch mat has wo chum masmak. <sup>17</sup> Bo masma an o'ohadag mash g Jiosh am ahgid g Abrahambad:

Bant m-juh mapt d wo  
ha-shohshonk g mu'i nahnko  
mahs hemajkam. *Genesis 17:5*

Id at wo ho hab e juh. K d wohokam hegai Jiosh ne'oki mat g Abrahambad ab i s-wohoch. Jiosh oki e nakog mat ab wo i wuhshad g muhki ab muhkig amjed k am wo nahto ha'ichu hab wabsh che'ek mat am hab wo e juh. <sup>18</sup> Abrahambad ash wa ab s-wohochud mat g Jiosh ab wo ha mah g ali mat eda kekelit chum as pi mahch mas has masma hab wo juh. Tsh heg hekaj hab juh g Jiosh mo d ha-shohshon g mu'i nahnko mahs hemajkam. Bo masma an hab chu'ig Jiosh o'ohana ed mo g Jiosh hab kaj:

G i ha neid g huhu'u.  
Ha'akia at d wo k g  
m-amjedkam. *Genesis 15:5*

Neh, boki kaij. <sup>19</sup>Tsh pi sha'i gawul juh g e-wohochudadag g Abrahambad, chum as hems aihim g siant ahidag. Kush g Sarabad pi ha mamdat. <sup>20-21</sup>Abrahambad ash ab si ihm g Jiosh nash pi ab si s-wohochud mat wo e nakog k woho am hab wo juh hegai mo haschu am ahgid. <sup>22</sup>Heg atsh hekaj am i ap'ech g Jiosh e tahgio k gam hu hab i juh g chu'ijigaj. <sup>23</sup>K pi heg wa'i wehhejed an o'ohanas hegai <sup>24</sup>ch wabshaba ahchim ep t-wehhejed. Jiosh atsh gam hu hab ep wo i juh g t-chu'ijig ahchim matt hab wa'ap ab i s-wohoch. <sup>25</sup>Heg atsh hekaj am i kei g t-kownalig Jesus mat wo e muhkid g t-chu'ijig wehhejed k ab ep wo i wuhsh muhkg amjed. Kutt am i t-ap'ech Jiosh tahgio ab i s-wohochudk ihda.

#### Matsh g Jiosh am i t-ap'ech e tahgio

**5** Am at i t-ap'ech g Jiosh e tahgio ahchim matt ab i s-wohoch g ha'ichu ahgaj ab amjed g t-kownalig Jesus Christ. Kuch heg hekaj ab wui si s-ap t-tahtk. <sup>2</sup>Sho'o wa'i si s-hemajima a t-wui. Kuch si s-hehggig ch ab nenida mat ab wo i t-wahpki e-kihdag ed k ab wo si t-ha'ichuch. <sup>3</sup>Chum as ha'ichu t-kudut, ch eda si s-hehggig nach pi s-mahch mo g t-kudutadag hab t-wua matt wo s-chu nakogad. <sup>4</sup>T g Jiosh s-ap wo i t-el mach s-chu nakog. Kutt id hekaj am wo i t-gewpkai heg wui mach ab nenida. <sup>5</sup>Ab at i t-mah g Jiosh g Hekia S-ap'ekam Gewkdag. K heg ab t-mahtchulid mo si pihk e elid g Jiosh ab t-wui. Ch hekaj s-mahch

mat woho am wo i t-wahpki g Jiosh e-kihdag ed.

<sup>6</sup>Dach wa pi ap chu'ijkam ch pi ha gewkdag machs hab wo juh ha'ichu matt hekaj am wo i t-ap'ech. T wabshaba g Jiosh am i ap'ech mat g alidaj e muhkid am t-wehhejed. <sup>7</sup>Pi o hedai e muhkidamk hema wehhejed. Tp hems hema hi wo wa e muhkid hema wehhejed mo d si o'odham. <sup>8</sup>Kuch eda d wa chum pi ap chu'ijkam. T g Jiosh am t-chehgi mo he'es ab si i t-tatchua am i ap'echudk mat g alidaj am t-wehhejed muh k gam hu hab i juh g pi ap t-chu'ijig. <sup>9</sup>Kuch hab s-mahch mat hahawa pi heg hekaj ab hu wo t-namkid. <sup>10</sup>Heki ach hu pi ab hu hajunima g Jiosh. T g alidaj muh am t-wehhejed mat hab wo t-juh matt ab haha wo hajunit g Jiosh. Pegih, ch ba'ich ab i ap'edag am Christ do'ibiatalig ed no pi d doakam ab muhkg amjed ch wo e nako mat wo i t-wehmtad. <sup>11</sup>Kuch si s-hehggig mat g t-kownalig Jesus Christ gam hu hab i juh g pi ap t-chu'ijig k am i t-ap'ech mach ab hahawa si s-hajunima g Jiosh.

#### Mash gawul masma g Adambad ch Christ

<sup>12-14</sup>Ab atsh ha'ichu cheha g Jiosh hegai mo d wehpeg o'odham ch hab chehggig Adam. Tsh heg mulin k hab i shonwuich g pi ap'ekam jewed dahm. Tsh hekaj am i shonwua muhkg. Tsh g Jiosh pi hab ep juh g chehanig am hugkam matsh an i wuhsh g Mosesbad. Sh eda wehsijj hab wua g pi ap'ekam. Kush heg hekaj g muhkg wehsijj ab ha a'ahe,



chum as pi mulin g chehanig hab masma matsh wa g Adambad.

Jiosh oki am ha'ichu t-chehgidch ab amjed g Christ id hekaj Adambad. <sup>15</sup>Wehsijj atsh ab ha'ichu i wahpki am wehs ha wehhejed g hemajkam. K wabshaba gawul mams hegai mat ab i wahpki. Do muhkig hegai matsh g Adambad ab i wahki wehs ha wehhejed g hemajkam. K wabshaba d Jiosh hemajmatalig hegai matsh g Jesus Christ ab i wahki wehs t-wehhejed. <sup>16</sup>K d al hemako hegai chu'ijig mat hekaj am i wah g s-ko'ok namkidadag. K wabshaba mu'ij g pi ap t-chu'ijig. K eda g Jiosh wehs gam hu hab i junihog am t-wehhejed. Ab o d t-wuikam hegai s-ko'ok namkidadag nach pi ab d Adambad amjedkam. K wabshaba d Jiosh mahkig ihda mat hab t-juni gm hu hab i juhk g pi ap t-chu'ijig. <sup>17</sup>Muhkig at ab wehsijj t-ma'ish heg hekaj. Adambad pi ap chu'ijig. K wabshaba g Jiosh si s-hemajim ab t-makiog g ho'ige'idadag. Kutt am aigo dahm i chehchsh g muhkig ahchim matt ab bei. Ab o t-mahkch g ap'edag am gahi wuhshanim g Christ matt s-ap wo himad g t-doakag id dahm jewed.

<sup>18</sup>Pegih, id ani em-ahgid mat g Adambad ab i wahki g s-ko'ok namkidadag am wehs t-wehhejed heg hekaj hemako pi ap e-chu'ijig. T wabshaba g Christ am hab juh g do'ibiadag am wehs t-wehhejed heg hekaj hemako s-ap e-chu'ijig ch ab t-makiog g wechij doakag. <sup>19</sup>Adambad at pi wohog el g Jiosh. K heg hekaj mu'ijj d pi ap chu'ijkam. Christ at hejel ab s-wohog el g

Jiosh. Kut heg hekaj mu'ijj ab wo i e ap'ech am Jiosh tahgio.

<sup>20</sup>Hemajkam o pi hohho'id g chehanig ch ba'ich hab i s-junimk g pi ap'ekam wa chum s-mahchch g chehanig. K wabshaba ab t-mahks matt hekaj wo s-mahchk mo he'es i ge'ej g pi ap t-chu'ijig. K eda g Jiosh ho'ige'idadag ba'ich i ge'ej no pi gam hu hab i junihog g t-chu'ijig. <sup>21</sup>Pegih, tt wo chum nei mat am t-gewito g pi ap'ekam nach pi heg hekaj ab aihim g muhkig. Heg o wa wepo mo d t-maliomig g pi ap'ekam ch am t-wanchshulig muhkig wui. Kuch wabshaba hemuch edgid g Jiosh hemajmatalig ab i s-wohochudk g s-kehg ha'ichu ahgaj ab amjed g t-kownalig Jesus Christ.

**Matt pi hab wo junihid g pi ap'ekam am i bek g wechij doakag**

**6** Pegih, tp hems ha'i hab wo chei matt hig ba'ich am hab wo i junihid g pi ap'ekam. T g Jiosh ba'ich wo i s-t-ho'ige'el. <sup>2</sup>K eda pi hab sha'i chum mahs machs am hab wo junihid g pi ap'ekam. Am att i dagito g pi ap'ekam. K pi am hu hahawa ha gewkdag t-dahm. Id o heg wa wepo matt heki hu muh natt pi pi hab hahawa ep wo junihid g pi ap'ekam. <sup>3</sup>Ab att t-chehgi g t-pahl wakonakaj matt ab i t-hemakoj Jesus Christ wehm. K heg wa wepo matt am wehmaj muh natt pi ab i t-hemakoj heg wehm mat muh. <sup>4</sup>T-pahl wakona o wepogidas matt wehmaj ged hu t-hiash am i muhk. T g Jiosh ab i t-mah g wechij doakag heg hekaj si ge'e e-gewkdag mat hekaj ab i wamigi g Christ muhkig amjed.

<sup>5</sup>Ab att i t-hemakoj heg wehm mat am t-wehhejed muh. Kut hekaj ab t-mah g wechij doakag. Id o wepo masma matt am wehmaj ko'o k wehmaj ep t-chechegito. <sup>6</sup>Am att i dagito g heki hu t-doakag. Kut hab gam hu hab i e juh g pi ap t-tatchui. K pi an hu hahawa t-wulshch g pi ap'ekam. <sup>7</sup>Nat hig hab ep wo juh g pi ap'ekam hegai mat heki hu muh? Pegih, tt ahchim hab wa masma am i dagito g pi ap'ekam ab i s-wohochudk mat g Christ am t-wehhejed muh. <sup>8</sup>Heg muhkig o d t-muhkig no pi d t-namkidadag. Id att ab i s-wohoch. T g Jiosh heg hekaj ab t-mah g wechij doakag k ab wo i t-wuwhas muhkig amjed hab masma mat hab juh g Christ. <sup>9</sup>Pi at hekid ep wo muh g Christ mat wa uhpam ep e chegito. Muhkig o pi am hu dahm gewkdag. <sup>10</sup>Hemho at muh mat wo kuhgi g pi ap'ekam gewkdag am t-dodakag ed k ep e chegito k hemuch d doakam wehhejed g Jiosh.

<sup>11</sup>Pegih, mt wo chum kuhgi g pi ap'ekam e-dodakag ed k d wo dodakamk wehhejed g Jiosh ab i e hemakochudk g Jesus Christ wehm. <sup>12</sup>Pi g wo hiwgidad g pi ap'ekam mas am ep wo i chikp g em-doakag mamt hekaj hab wo juh g pi ap e-tatchui. <sup>13</sup>Wehs amt am wo i e-dagito Jiosh wui namsh pi d e do'ibiakam ab amjed g muhkig. T am haha wo i em-hekaj g Jiosh mamt am hab wo junihid g s-ap'ekam. Pi g wo sha'i e hiwgid mas wo em-hekaj g pi ap'ekam has i masma. <sup>14</sup>Heki ach hu ab wecho g chehanig ch wabshaba hemuch edgid g Jiosh hemajimatag ch

hab pi hab wo chum junihid g pi ap'ekam.

**Matt am wo i t-dagitokchid  
s-ap'ekam wui**

<sup>15</sup>Pegih, t hahawa pi ab hu ha'ichu wo t-abch g chehanig nat pi g Jiosh ab s-t-ho'ige'id k t-do'ibia. Kutp hems heg hekaj ha'i hab wo elidad mat am hab wabsh wo i junihid g pi ap'ekam. <sup>16</sup>T wabshaba g pi ap'ekam an wo ha u'ukchid matp hab wo junihid. T g Jiosh s-ko'okam ab wo ha namkid. Ab amt wo s-wohog elidad g Jiosh. T heg am wo i em-ap'ech e wehhejed. <sup>17</sup>Pi ap'ekam o wa an em-u'ukch. Kumt wabshaba ab i s-wohoch g wohokam ab amjed g Jiosh. Kuni id hekaj ab si ho'ige'id g Jiosh. <sup>18</sup>E amt wul'o ab amjed g pi ap'ekam. K g s-ap'ekam an hahawa em-u'ukch.

<sup>19</sup>Ni wabsh g pi hasig ne'okikaj em-tashogid nam pi pi koi si s-amichud. Am amki wa e dagitokch si s-uam ha'ichu wui ch hab junihim g pi ap'ekam. Tsh g Jiosh em-do'ibia. Kumt am hahawa wehs wo i e dagito s-ap'ekam wui ch hab wo junihid g Jiosh tatchui.

<sup>20</sup>Pi am ab hu kaiham g s-ap'ekam mo hekid g pi ap'ekam an em-u'ukch. <sup>21</sup>Kut pi ha'ichu s-ap hab em-juni g pi ap'ekam. Si am wa e eh'elid mam wa am hab junihim. K g pi ap'ekam ab wabsh em-ahijidahim g s-ko'ok em-namkidadag. <sup>22</sup>Kumt wabshaba e wul'o ab amjed g pi ap'ekam. K g Jiosh d hahawa em-ahmo ch hab em-juh mam d hahawa s-ap'ekam. K ab him mamt ab wehs wo bei g pi ha huhugedam doakag. <sup>23</sup>Hegam mat hab wo junihid g pi ap'ekam

at ab wo ai g s-ko'ok e-namkidadag. T wabshaba hegam mat ab wo i e dagito t-kownalig Jesus Christ wui ab wo bei g pi ha huhugedam doakag.

**Mo g Paul ha'ichu chum ha tashogid g hohntakaj**

**7** Neh, ni-wepnag, s-mahch amki mo has chu'ig g t-chehanig. Kuni heg hekaj hab em-elid mamt wo s-amich ihda mant wo em-ahgi. Chehanig o an u'ukch g o'odham am hugkam mat he'es i tash d wo doakamk. <sup>2-3</sup>Pegih, k hab chu'ig g chehanig mat g uwi pi ep wo ha kunt mat eda g kunaj d wabsh wo kia doakamk. K wabshaba hiwigidas mat wo ha kunt matp g kunaj heki hu wo muh. Pi o ab hu hahawa shohbidch g chehanig.

<sup>4</sup>Pegih, k hab wa'ap chu'ig am t-wehhejed ahchim matt ab i s-wohoch g s-kehg ha'ichu ahgaj g Jiosh. Am att i t-hemakoj g Christ wehm. K id heg wepogidas matt am wehmaj muh. K pi an hu hahawa t-u'ukch g chehanig. Dach enigaj hegai mat e chegito ab muhkig amjed ch hekaj s-ap ha'ichu hab wo chum junihid am wehhejed g Jiosh. <sup>5</sup>Am o wabsh ha chu'amun g chehanig hegam mo pi mahch g Jiosh. K ba'ich hab i junihim g pi ap'ekam. K g s-ko'ok ha-namkidadag ab ha aihim. <sup>6</sup>Tt wabshaba ab i t-hemakoj g Christ wehm. T g Jiosh t-wul'o ab amjed g chehanig. Heki ach hu am chum chikpanid g Jiosh g chehanigkaj. K wabshaba hemu g Hekia S-ap'ekam Gewkdag t-wanimed. Ch hahawa woho chikpanid.

**Mach wa ab abchudas g Jiosh chehanigkaj**

<sup>7</sup>Ha'i o hab elid mo pi ap'e g Jiosh chehanig. K wabshaba pi woho. Chehanig o am t-tashogid g pi ap t-chu'ijig. Neh, pi att wo chum mahchk mo pi ap'e mach si pihk t-elid g ha'ichu t-enigakaj. K wabshaba g chehanig am t-tashogid mo pi ap'e. <sup>8</sup>Kuch wa am hahawa ba'ich i s-gewkam si pihk t-elid g ha'ichu t-enigakaj. Matp pi an hu wo ha'ichug g chehanig, t d wabsh wo pi ha'ichuk g pi ap'ekam. <sup>9</sup>Neh, pi ani has sha'i ni-tahtk mani eda pi ap mahch g chehanig. Nt hahawa s-mai. T ba'ich am i si e chehgi g pi ap'ekam am ni-eda. Kunt s-mai maniki aihog g s-ko'ok ni-namkidadag. <sup>10-11</sup>Jiosh at hab juh g e-chehanig matt heg hekaj wo s-mai matt has masma wo bei g s-ap doakag. Kunid eda heg ab am cheh maniki d pi ap chu'ijkam ch ab aihog g ni-muhkig ch s-ko'ok ni-namkidadag.

<sup>12</sup>Do hekia s-ap'ekam ch s-kehgaj g chehanig ch am t-tashogid matt has wo chum t-junihid. <sup>13</sup>Pi at g chehanig hab ni-juh mani ab aihog g ni-muhkig ch s-ko'ok ni-namkidadag. Pi ap'ekam at hab ni-juh mani wa ab aihog. Chehanig o s-kehgaj. K g Jiosh heg hekaj am t-tashogid mo haschu d pi ap'ekam ch has masma si pi ap'e.

**Heg o wa wepo mani gohk dodakag**

<sup>14</sup>Pegih, k d hekia s-ap'ekam g chehanig. Kuni wa wabshaba d wabsh o'odham. K wa g pi ap'ekam an ni-u'ukch. <sup>15</sup>Pi o wa ta amichudama

g ni-doakag am ni-wehhejed mani wa eda wabsh hejel ab ni-hiwig. S-mahch ani mo haschu d s-ap'ekam ch wabshaba pi am hu hab junihim ch heg hab wa'i junihim mani haschu i pi hohho'id. <sup>16</sup>Id ani wa hekaj wohokamchud mo g chehanig s-ap'e. <sup>17</sup>Pi ani wa hab chum junimk g pi ap'ekam. K wa wabshaba heg an ni-u'ukch. K wa heg hekaj heg wa wepo mani wa pi d si ahni ch am hab junihim. <sup>18</sup>Ni-doakag o wa d wabsh hekia pi ap'ekam mani wa eda pi ab hu hiwig g Jiosh. Kuni wa pi sha'i ni-nakog manis am hab wo junihid g s-ap'ekam, chum anis wa hab s-junimk. <sup>19</sup>Heg ani hab wa'i junihim pi ap'ekam, chum anis pi hab chum junimk. <sup>20</sup>Heg ani wa hekaj hab kajj mani pi d si ahni ch hab junihim. Pi ap'ekam o wa an ni-u'ukch.

<sup>21</sup>Pegih, boki chu'ig g t-doakag mach eda pi ab hu hiwig g Jiosh. Pi att wo t-nako machs hejel am hab wo junihid g s-ap'ekam, chum achs hab s-junimk. <sup>22</sup>S-mahch ach mo s-ap'e g Jiosh chehanig. <sup>23</sup>K wabshaba g pi ap'ekam an t-u'ukch ch hab t-wua mach ab wui gegok.

<sup>24-25</sup>Pegih, boki chu'ig g t-doakag mach eda pi ab hu hiwig g Jiosh. Bach chum s-junimk g Jiosh chehanig ch wabshaba am hab wabsh junihim g pi ap'ekam. K pi in hu hedai ha'ichug mas wo t-do'ibia. Kuch heg hekaj si pi ap t-tahtk. T wabshaba g Jiosh am i kei g e-alidag Jesus Christ. Kut heg t-do'ibia. Id ach hekaj ab si ho'ige'id g Jiosh.

**Mo g Hekia S-ap'ekam Gewkdag ab t-mahkch g wechij doakag**

**8**

Pi o ab hu hahawa t-abchud g Jiosh g ha'ichu t-chu'ijig

ahchim mach ab si hiwig g Jesus Christ. <sup>2</sup>Hekia S-ap'ekam Gewkdag at t-wul'o ab pi ap'ekam t amjed k ab t-mah g wechij doakag. K pi ab hu hahawa t-aihog g s-ko'ok t-namkidadag. <sup>3</sup>Pi att wo sha'i t-nako machs am hu hab wo junihid g chehanig ch hekaj wo t-do'ibia nach pi d wabsh o'odham. T wabshaba g Jiosh am i kei g e-alidag mat wo t-do'ibia. T heg ia i wuhsh jewed dahm k hab masmakahim mach ahchim ch wabshaba pi ha chu'ijig ch gam hu hab i juh g pi ap t-chu'ijig. <sup>4</sup>Jiosh at hab masma am i t-ap'lech e-tahgio k hab masma ab t-neid matt pi hekid sha'i mul g chehanig ahchim mach ab i t-dagitokch Hekia S-ap'ekam Gewkdag wui ch pi am hu hab junihim g hejel pi ap t-tatchui.

<sup>5</sup>Hegam mo hab junihim g hejel e-tatchui o heg hekaj an e u'ukch. K hegam mo hab junihim g tatchuij g Hekia S-ap'ekam Gewkdag heg hekaj an epai e u'ukch. <sup>6</sup>Am o hihim s-ko'ok e-namkidadag wui hegam mo hab junihim g hejel e-tatchui. Ch ahchim mach hab junihim g Hekia S-ap'ekam Gewkdag tatchui am Jiosh kihdag wui hihimad ch hekaj wo si s-ap t-tahtkkad. <sup>7</sup>Do obgaj g Jiosh hegai mo hedai g hejel e-tatchui hab junihim no pi pi ab hu wohog elid g Jiosh ch pi wo sha'i e nako mas am hab wo e juh. <sup>8</sup>Pi at wo e nako hegam mo hab wua g hejel e-tatchui mas hab wo juh g Jiosh tatchui.

<sup>9</sup>Ch wabshaba ahchim pi g hejel t-tatchui hab wua. Hekia S-ap'ekam Gewkdag o am t-eda

hab chu'ig. Kuch heg tatchui hab wua. Hegam mo pi am hu ha eda g Hekia S-ap'ekam Gewkdag o pi d Jiosh hemajkamga. <sup>10</sup>T ahchim am i t-ap'ech g Christ am tahgio g Jiosh k ab t-mah g Hekia S-ap'ekam Gewkdag. Kuch heg hekaj edgid g wechig doakag, chum as hi wa g muhkig ab wehs ha aihog g hemajkam g pi ap ha-chu'ijigkaj.

<sup>11</sup>Kut am uhpam ep wo t-chegitoich g Hekia S-ap'ekam Gewkdag hab masma mat hab juh g Christ.

<sup>12</sup>Pegih, ni-wepnag, ab o d t-wuikam matt hab wo junihid g Jiosh tatchui. <sup>13</sup>Jiosh at gam hu hab wo i t-juh mattp am hab wo sha junihid g hejel t-tatchui. Hekia S-ap'ekam Gewkdag o am i em-wehmaj. Kumt gam hu wo s-ohhod g pi ap ha'ichu hab e-juni k hab wo edgidag g wechij doakag.

<sup>14</sup>Ab at t-mah g Jiosh g Hekia S-ap'ekam Gewkdag. K heg am t-wanimed. Ch hab s-mahch mach d Jiosh a'aliga <sup>15</sup>ch ab ihm mo d t-ohg ch pi sha'i ehbid. <sup>16</sup>Hekia S-ap'ekam Gewkdag o am t-tashogid mach d a'aligaj g Jiosh. <sup>17</sup>Jiosh at ab wehs mah g e-alidag g e-ho'ige'idalgid k hab wa'ap wo t-mah nach pi hab wa'ap d a'aligaj. Kutt wabshaba wehpeg ab wo nako g sho'igdag hab masma mat heg hab e juh mo d si alidaj.

#### **Matsh ab wo si has t-elidad g Jiosh**

<sup>18</sup>Si atsh ge'e ab wo has t-elidad g Jiosh. Kutt hab pi wo sha'i kuint g al t-sho'igdag ia jewed dahm.

<sup>19</sup>Jiosh atsh wehs ha'ichu dahm wo t-mahsko wua ahchim a'aligaj. K wehs ha'ichu nahtoj heg nenida.

<sup>20-21</sup>Do Jiosh hab elida mat wehs e padch g nahtoj mat eda g o'odham pi ap chu'i. Wehs ha'ichu o ab hahawa e wulshch g pi ap'ekamkaj. Tsh wabshaba g Jiosh wo wul'o g e-nahtoi mat hekid am wo mahsko t-wua ahchim a'aligaj. Tsh wehs ha'ichu hahawa ep si s-kehg hab wo mahsk.

<sup>22</sup>S-mahch ach mo hemuch g ha'ichu nahtoj g Jiosh shahag wepo mo shahshani hab sha masma mat g uwi g ali wo be k ab i taht g s-ko'ok. <sup>23</sup>Ahchim mo g Jiosh ab t-mahkch g Hekia S-ap'ekam Gewkdag ach hab wa'ap shahshani ch ab si nenida mat am wo i nahto g t-do'ibiadag k wo wechijid g t-chuhkug. Hekia S-ap'ekam Gewkdag o d wehpeg mahkigdag g Jiosh ab t-wui. <sup>24</sup>Ab att i s-wohoch g Jiosh. Kut t-do'ibia. K wabshaba am wabsh kia wi'is mat wo nahto g t-do'ibiadag k am wo i t-wahpki e-kihdag ed. Kuch s-wohochud mat id hab wo t-juni. <sup>25</sup>Wohochudadag o hab d ahga mamt s-e tahtk ch ab wo nenidad hegai mamt koi nei.

<sup>26</sup>Pi ach ahim gewkdag. K wabshaba g Hekia S-ap'ekam Gewkdag i t-wehmaj. Pi ach mahch matt has masma wo t-ho'ige'idahunad am Jiosh wui. K wabshaba g Hekia S-ap'ekam Gewkdag ab t-mahtchulid. Kuch hab shahshani ch shoak am Jiosh wui ch pi sha'i mahch matt has masma hab wo chei hegai mo haschu ab t-tahtchud. <sup>27</sup>K wabshaba g Jiosh s-mahch g t-ihbdag ch ep s-mahch hegai mo haschu ab t-tahtchud g Hekia S-ap'ekam Gewkdag. Heg o hab

wua g t-ho'ige'idahuna am Jiosh tatchui oidch. Kuch ab tahni g i wehmtadag am ha wehhejed g Jiosh hemajkamga.

<sup>28</sup>Ab at i t-wai g Jiosh matt d wo hemajkamgajk. Kuch ab wui si pihk t-elid. K g Jiosh heg hekaj wehs ha'ichu am i ap'echud mat t-wehhejed wo s-ap i wuhsh ha'ichu.

<sup>29</sup>Heki o hu s-mahch g Jiosh mat hedai ab wo kaiha g waidaj ch am ap'ech matt wo wepo chu'igk g alidaj ch wehmaj d wo a'aligajk. T g alidaj d wo wehpeg t-si'ihgek. <sup>30</sup>T wa woho ab i t-waid k am i t-ap'ech e tahgio k hahawa pi ab hu ha'ichu t-chu'ijigchud. K am ba'ich ehp mat ab t-mah g si has e-elidadag.

**Mat pi ha'ichu wo e nako mat wo i t-gawulkai ab Jiosh amjed**

<sup>31</sup>Pegih, bo masma am t-wehhejed kehk g Jiosh. T hab pi hedai wo e nako mas ab t-wui wo kekiwua. <sup>32</sup>Pi at sha'i t-da'i g Jiosh g e-alidag. Kuch heg hekaj s-mahch mat pi ha'ichu ep wo sha'i t-da'i. Alidaj at ab wui e iagchul am t-wehhejed. <sup>33</sup>T g Jiosh heg hekaj gam hu hab i juh g pi ap t-chu'ijig. T hab pi hedai wo e nako mas ab wo ha'ichu t-abch. <sup>34</sup>Jiosh alidag at ab nako g s-ko'ok t-namkidadag am t-wehhejed muhk. T hab pi wo t-ai hegai t-namkidadag. T g Jiosh ab i wuhshad muhkig amjed k an s-apko dai e-hugid an. K heg am t-wehhejed e ho'ige'idahun ab Jiosh wui. <sup>35</sup>Kuch eda hi wa hebaichujj ab nakog g kudutadag ch s-hasig ha'ichu ch sho'igchudadag nach pi d Christ wohochuddam. Bihugig ch sho'igdag ch s-ta ehbidam ha'ichu

ch cheggiadag o ab ep t-aihog. <sup>36</sup>Bo chu'ig g Jiosh ha'ichu ahga:

“Chum ach hekid ab nakog g s-ta ehbidam ha'ichu am wehhejed g Jiosh.

Kum hab t-elid mach ab aihim g muhkig hab masma mo g ha-gi'ichuda kakawal.”

*Psalm 44:22*

Neh, ttp hems hebai hab wo i el mat am i ha'asa si pihk e el g Christ ab t-wui. <sup>37</sup>K wabshaba id pi woho. Ab o si pihk e elid g Christ t-wui ch ab t-mahkch g gewkdag. Kuch wehs gewitoghim g t-kudutalig. <sup>38-39</sup>S-mahch ani mat pi hekid ha'ichu wo sha'i e nako hemuch o gam hu t-ba'ich mas an wo shohbi g Jiosh pihk elidadag ab t-wui mattp hebai wo i k id dahm jewed o in t-dahm. Pi at g muhkig o g doakag wo shohbi, ni'is g anghil o g s-ta ehbidamkam gewpkdag. Ab o t-chehgidch g t-kownalig Jesus Christ mo t-hekaj si pihk e elid g Jiosh. Kut pi hekid ha'ichu wo sha'i e nako mas an wo shohbi g pihk elidadaj.

**Mo has masma ab ha neid g Jiosh g Tutuligo hemajkam**

**9** <sup>1-2</sup>Mu'ijj g ni-wehm Tutuligo o s-ohhodamk g Jesus pi wohochudch mo d Jiosh si Kehsha. Kuni heg hekaj si pi ap ni-tahtk. K g ni-ihbdag sha'i si s-ko'ok. S-mahch ani mani g wohokam em-ahgid nani pi pi ni-elid ch em-ahgid. K g Hekia S-ap'ekam Gewkdag an ni-u'ukch. <sup>3</sup>Si ani tatchua mat wo e do'ibia g ni-wehm o'odham, chum anis hems heg hekaj pi wo ni-do'ibia. <sup>4-5</sup>Do chum Jiosh

hemajkamga. Jiosh at ab i ha chuhcha g t-shohshonbad k am ha ahgid mat si s-kehg ha'ichu hab wo t-juni. Ab o si has t-elid g Jiosh ch ab t-mahkch g e-chehanig. Kuch hab s-t-mahch ch hab junihim g ab si has elida Jiosh wui. T g Jiosh si Kehsha ab t-amjed i wuhsh ia jewed dahm. Tt heg hekaj ab wo si has elidad g Jiosh chum hekid. Neh!

<sup>6</sup>K eda mu'ijj g ni-wehm o'odham pi ab hu wohochud g Jiosh si Kehsha. K wabshaba id pi hab d ahga mas g Jiosh pi am hu hab wo juh hegai mo hab kajj mat hab wo juh. Pi atsh wehsijj g Tutuligo d wo Jiosh hemajkamgak. <sup>7</sup>Id ant am wo em-tashogi am em-ahgidch ab amjed g Abrahambad. Pi atsh wehsijj g Abrahambad amjedkam wo enigak hegai mash wa g Jiosh ab makiog. Gohk ash wa a'alidag g Abrahambad. Sh hema hab chehgig Isaac. Kush g Jiosh hab kajj ab Abrahambad wui:

Hegam wa'i Isaac amjedkam at wo enigak hegai mani ab m-makiog. *Genesis 21:12*

<sup>8-9</sup>Ihda Isaacbad ash d hegai matsh wa g Abrahambad wehm kihkam bei matsh eda heki hu okst natsh pi g Jiosh am i ha wehmt k hab kajj:

Dat wo hemako ahidagk, t g Sarah wo ge cheoj madt.

*Genesis 18:10*

Id o am chehgidch mat hegam d wo wa'i Jiosh hemajkamgak mat hedai g Jiosh am wo i ha chuhcha.

<sup>10</sup>Neh, tsh am hema hohnt g Isaacbad am i ge'edak. Sh id hab chehgig Rebecca ch gohk ha mahmadt. <sup>11-12</sup>Sh hab kajj g Jiosh ab wui g Rebeccabad:

Ge'echu at d wo piongajk g alichu. *Genesis 25:23*

Tsh eda idam koi an hu mamsi k koi ab hu ha'ichu chu'ijjig. Tsh g Jiosh ab i wai g chumchu mat hekaj wo tashok mo ab hejel ab g Jiosh mat hedai ab wo i ha wai. <sup>13</sup>Hegai mo d ge'echu ash hab chehgig Esau. Sh g chumchu hab chehgig Jacob. K hab chu'ig g Jiosh o'ohana mash g Jiosh hab kajj:

Ab ant i wai g Jacob k g wehngaj Esau pi ab hu i wai.

*Malachi 1:2-3*

<sup>14</sup>Pegih, na'ams ha'i hab elid mat pi ap chu'i g Jiosh. K wabshaba pi hab chu'ig <sup>15</sup>nash pi hab kajj ab Mosesbad wui:

Nt wo s-ha ho'ige'el hegam mani hab ha elid. *Exodus 33:19*

<sup>16</sup>K heg hekaj tasho mo s-ha ho'ige'id heg wabsh hekaj mo hab ha elid. Pi at hedai heg wabsh hekaj wo nei g Jiosh ho'ige'idadag mas haschu i tatchua ch haschu am hab juni him.

<sup>17</sup>An o o'ohanas mash hab kajj g Jiosh am wui g ha-kownalig g Egypt t am hemajkam:

Am ant i m-dai mapt d wo kownalk id si hekaj mant ab m-wui wo kekiwua k am wo ha chehgi g ni-gewkdag k am wo mahsko ni-wua wehsko jewed dahm. *Exodus 9:16*

<sup>18</sup>K heg hekaj tasho mo g Jiosh s-ha ho'ige'id mo hedai hab i elid ch hab ha wua mo hedai hab i elid mat pi ab hu wo kaihamad g ne'okij.

**Matsh g Jiosh ha'i wo s-ha ho'ige'id k ha'i wo ha lodai**

<sup>19</sup>Neh, tp hems hema wo kah ihda k hab wo chei, "Pegih, pi at

ha'ichu ab hu wo chum t-abch g Jiosh matp heg hab wa masma hab t-juh map has i kajj." <sup>20</sup>Nt wabshaba wo em-ahgi mo pi ab hu sha'i ab g o'odham mas ab wui wo neo g Jiosh. Dach Jiosh nahtoi ch pi edgid g ap'edag machs ab wui hab wo chei mas haschu ahgk hab masma t-nahto.

<sup>21</sup>Neh, nat hig pi hab wo ha juh g haha'atdam g hab mams haha'a mat wo tatchuad? Hema atp hems d wo s-kehg ha'ak ch hema d wo pi kehg ha'ak. <sup>22</sup>Pegih, t g Jiosh wehs hab ha juh g hemajkam. K ha'i pi ap d hemajkam. K wabshaba g Jiosh s-ha bahbgi. T am wo i e ai mat am wo chehgi g e-gewkdag k wo s-ko'okam ha namkid. <sup>23</sup>Kuch ha'i s-ap d hemajkam no pi ab si s-t-ho'ige'id g Jiosh. Am at i t-ap'ech matt hab masma wo nei g gewkdaj.

<sup>24</sup>Ahpim gawul mahs hemajkam am d ep waidaj. Jiosh at ab ep i em-gawulkai. <sup>25</sup>Neh, bo masma an o'ohadag heg o'ohana ed mash hab chehgi Hosea mo hab kajj g Jiosh:

Bant wo ha juh hegam mo pi d ni-hemajkamga mat d haha wo ni-hemajkamgak k ab wo si pihk ni-elidad ha wui.

<sup>26</sup>Kumt hab wo ha a'agad mo d ni-hemajkamga.

*Hosea 2:23, 1:10*

Neh, bash kajj g Jiosh. <sup>27-28</sup>Kush wa g Isaiabad d Jiosh ha'ichu i tashogiddam ch hab kajj:

E o aihim mat g Jiosh ab wo ha mah g ha-namkidadag wehs hemajkam.

T pi sha'i mu'i wo e do'ibia g Tutuligo hemajkam, chum as wo si mu'ijk hab sha masma mo g o'od. *Isaiah 10:22-23*

<sup>29</sup>Sh wa am hu hebai hab ep kajj g Isaiabad:

S-ap atsh huhug g pi ap'ekamkaj hegam kihhim mash hab chehgi Sodom ch Gomorra.

Kut ahchim Tutuligo hab wa'ap s-ap wo huhug mat hems g Jiosh pi wo ha'i t-do'ibia.

Sha'i si s-gewkdag g Jiosh.

*Isaiah 1:9*

**Mo g Tutuligo hemajkam pi amichud g Jiosh si Kehsha**

<sup>30</sup>Pegih, pi am wa am hu e gahgid g Jiosh ap'edag ahpim gawul mahs hemajkam ch wabshaba am i kah ab amjed g Jiosh alidag k ab i s-wohoch. T g Jiosh am i em-ap'ech e tahgio gam hu hab i juhk g pi ap em-chu'ijig. <sup>31</sup>K g ni-wehm o'odham am i chum e ap'echud g chehanigkaj ch pi bei g e-ap'edag <sup>32</sup>nat pi pi ab hu wohoch g Jiosh k pi ab hu bei g si Kehshaj k wabsh am hab chum s-junimk g s-ap'ekam mat hekaj wo s-ap'ek am Jiosh tahgio. Id o heg wa wepo mat e huchwua ab hodai t ab. <sup>33</sup>An o hab chu'ig Jiosh o'ohana ed mo hab kajj g Jiosh:

Am ant wo i maskogi g si ni-Kehsha ha shahgid g Tutuligo mat d wo chum ha-do'ibiadagk.

T pi wo e do'ibia hegam mat pi ab hu wo wohoch.

Id at heg wo wa wepok mat ab wo e huchwua hodai t ab k wo i shul.

Hegam at wo wa'i e do'ibia mat ab wo i s-wohoch. *Isaiah 28:16*

Neh, bo chu'ig g Jiosh o'ohana.

**10** Ni-wepnag, chum ani si tatchua mat hu wo i e



do'ibia g ni-wehm o'odham ch heg hekaj am ni-ho'ige'idahun Jiosh wui. <sup>2</sup>Hegam o tatchua mat am wo i e ap'ech Jiosh tahgio ch wabshaba pi ap mahch mas has masma hab wo e juh. <sup>3</sup>Jiosh at am i ap'ech matt has masma wo s-ap'ek am tahgio. K g ni-wehm o'odham wabsh s-ohhodamk g apchudaj ch wabsh hejel am chum s-e apchudamk <sup>4</sup>ab s-wohog elidch g Jiosh chehanig. K wabshaba g Jiosh am t-chehgidch matt ab wabsh wo i s-wohoch g s-kehg ha'ichu ahgaj k ab wo i hiwigi g Christ. T heg am wo i t-ap'ech am tahgio.

**Mo wehs ab d chum  
t-wuikam g do'ibiadag**

<sup>5</sup>An atki hi wa o'oha g Mosesbad mash hab kaj g Jiosh:

Wehs amt wo himad g  
ni-chehanig mamt heg hekaj  
wo bei g pi ha huhugedam  
doakag. *Leviticus 18:5*

<sup>6</sup>K oi wa tasho mat pi hedai wo sha'i e nako mas wehs wo himad. K eda in ha'ichug g do'ibiadag ahga. Kush heg hekaj hab kaj g Jiosh matt ab wabsh wo i s-wohochud k ab wo i hiwigi. Kut am wo i t-ap'ech hejel e tahgio. An o hab chu'ig Jiosh o'ohana ed:

Pi g hab wo i e ahgi mat hedai  
am wo em-behijidam g  
do'ibiadag dahm kahchim  
wui. *Deuteronomy 30:12*

Neh, bo chu'ig nat pi g Jiosh alidag ia heki hu i t-behij. <sup>7</sup>K an ep o'ohanas:

Pi g hab ep wo i e ahgi mat hedai  
am wo em-behijidam jewed  
wecho. *Deuteronomy 30:13*

Jiosh alidag at heki hu ab i wuhsh muhkg amjed mat ab wo t-mah.

<sup>8</sup>Bo hig woho chu'ig:

Pi o sha'i mehk g Jiosh ha'ichu  
ahga ab em-amjed.

Chum am hekid ne'okchulid ch  
si s-mahch. *Deuteronomy 30:14*

Neh, id o d ihda ha'ichu ahga ab amjed g wohochudadag mach am ahgahim. <sup>9</sup>Am g wo wohokamchud mo g Jesus d em-kownalig ch ab uhpam e chegito muhkg amjed. T g Jiosh wo em-do'ibia. <sup>10</sup>Wehsijj atsh am wo i ha ap'ech g Jiosh hegam mat hedai ab wo i s-wohoch g alidag e-ihbdag amjed. T wo e do'ibia am i wohokamchudk mo g Jesus d ha-kownalig.

<sup>11</sup>Bo chu'ig g Jiosh o'ohana:

Mat hedai ab wo s-wohochud k  
wo e do'ibia. *Psalms 34:22*

<sup>12</sup>Pi o ahchim wa'i Tutuligo hab t-ahg. Wehs hemajkam o d ha-kownalig g Jiosh ch wehsijj s-ba'ama ab wo s-ha ho'ige'el hegam mat ab wo tahnid.

<sup>13</sup>Bo chu'ig g Jiosh o'ohana:

Matp hedai ab wo tai g Jiosh k  
wo e do'ibia. *Joel 2:32*

<sup>14</sup>T wabshaba pi hedai has masma ab hu wo tai matp pi ab hu wo wohochudad. T hab wa'ap pi hedai has masma wo kah matp pi hedai wo ha ahgidag g ha'ichu ahgaj.

<sup>15</sup>Kut pi hedai wo e nako mat hejel wo i e ah mat an wo ahgachugad. Jiosh o wa ab t-chehani.

An o hab chu'ig Jiosh o'ohana ed:

Sho'o wa'i si s-kehg hab mahs  
mat wo dada g s-kehg ha'ichu  
ahgdam. *Isaiah 52:7*

<sup>16-17</sup>Pegih, ch an ahgachug g s-kehg ha'ichu ahgaj g Jiosh ab amjed

g si Kehshaj. T ha'i kah k ab i s-wohochud k ab wui e dagito k ha'i ehpi ab hu wohoch. An atki o'oha g Isaiabad matsh id hab wo e juh. K an hab chu'ig o'ohanaj ed:

Ni-kownalig Jiosh, pi at mu'i ab hu wohoch g ha'ichu t-ahga ahchim ha'ichu i m-tashogiddam. *Isaiah 53:1*

Neh, boki kajj. <sup>18</sup>K hemuch ha'i hab chech'e mo pi wehsijj kah g hemajkam g Jiosh ha'ichu ahga. Nt wabshaba wo em-ahgi mo wehsijj neid g Jiosh nahtoi. K g Jiosh o'ohana hab chu'ig:

An o wehsko e tashogid g Jiosh e-nahtoi ed. *Psalms 19:4*

<sup>19</sup>Tki an o'oha g Mosesbad moki hab kajj g Jiosh am ha wui g Tutuligo:

Bam ha ahg g gawul mahs hemajkam mo pi d Jiosh hemajkamga ch pi ha'ichu a'amichud.

Nt wabshaba ab wo ha mah g ap'edag.

Kumt haha wo s-ha hehgam k wo babgat ab ha wui.

*Deuteronomy 32:21*

<sup>20</sup>Tki g Isaiabad an o'oha mash s-gewkam hab kajj g Jiosh:

Am ant ni-chehgi ha wui hegam mo pi an hu ni-gahg.

T ab i s-ni-mai hegam mo pi ni-mahch. *Isaiah 65:1*

<sup>21</sup>T an ep o'oha g Isaiabad mo hab kajj g Jiosh ab ha amjed g Tutuligo hemajkam:

Tash oidam ani ab i chum ha waid idam hemajkam.

K wabshaba pi chechkaidag ch pi ab hu ni-wohog elid.

*Isaiah 65:2*

Mat pi gam hu wehs s-ha ohhod g Jiosh g Tutuligo

**11** Pegih, na'as hab sha elidas mat gam hu s-ha ohhod g Jiosh g Tutuligo mat pi d haha wo hemajkamgajk. K wabshaba pi hab mahs. Ahni ani hab wa'ap d Tuhligo. T g Jiosh pi gam hu ni-ohhod. Benjaminbad o d si ni-shohshon ch heg d amjedkamaj g Abrahambad. <sup>2</sup>Pi at gam hu s-t-ohhod g Jiosh. Dach chum hemajkamgaj. Heki at hu ab i ha gawulkai g t-shohshon.

Batsh wa masma pi gam hu ha ohhod wenog mash wa g Elijabad d doakam ch d Jiosh ha'ichu i tashogiddam. M o hi wa woho mash wa am ha gagda g e-hemajkamga Jiosh wui hab kajjch:

<sup>3</sup>Ni-kownalig Jiosh, ha at kokda g ni-wehm o'odham g ha'ichu i m-tashogiddam k i shul g iagchulidakud.

Ahni ant wa'i hejel in wih.

K ep chum s-ni-mu'amk.

*1 Kings 19:10*

<sup>4</sup>Sh wabshaba hab kajj g Jiosh ab wui:

Am ani wabsh kia nuhkud g wewa'ak mihl hemajkam.

K idam ab has ni-elid ch pi ha'ichu ep jioshga.

*1 Kings 19:18*

Neh, bash wa kajj g Jiosh. <sup>5</sup>K ia'i idani am hab wabsh i masma. Ab at ha'i s-t-ho'ige'el g Jiosh ahchim Tutuligo k ab i t-gawulkai. Kuch ab s-wohochud. <sup>6</sup>Pi at heg hekaj ab i t-gawulkai machs haschu has i juh k wabshaba heg hekaj mo s-t-ho'ige'id. Pi at d wo wohokam

ho'ige'idadagk matp g Jiosh heg ab wo ha himch g hemajkam mo haschu has i junihim k ab wo i ha gawulkai e wui.

<sup>7</sup>Pegih, al he'ekia at ab i ha gawulkai g Jiosh g ni-wehm o'odham. T idam cheh g e-gahgi. Mu'ijj at pi cheh no pi pi chechkaidag ab Jiosh wui. <sup>8</sup>K hab chu'ig g Jiosh o'ohana:

Jiosh at hab ha juh mo pi ha'ichu a'amichud.

K am hab wabsh i chu'ig id i tashkaj.

Shahag wepo mo pi ha'ichu neid ch pi ha'ichu kah.

*Deuteronomy 29:4*

<sup>9</sup>David ash wa hab kaij ab Jiosh wui:

Hegam mat gam hu s-m-ohhod at wo hejel e sho'igch am e-piapiast ed k wo i shulig k s-ko'okam wo e namkid

<sup>10</sup>k heg wo wa wepok mo pi ha'ichu neid.

T g ha-kudutadag ab wo si i wehchi. *Isaiah 69:22-23*

<sup>11</sup>Neh, bo chu'ig. Jiosh at am ha dagito hegam ni-wehm o'odham mo pi ab hu kaiham. T heg hekaj am i e ahgahi g do'ibiadag ahga gawul mahs hemajkam ha wui. Kutp hems ha'i g ni-wehm o'odham wo s-ha hehgam k ab haha wo kaihamad g Jiosh. Kut pi wabsh wo s-kehg ha hugio g Jiosh. <sup>12</sup>Pi at ap chu'i g ni-wehm o'odham k ab ai g ge'e sho'igdag T heg hekaj g ge'e ho'ige'idalg ab hih nahnko mahs hemajkam ha wui. Ab o him g tash mat mu'i Tutuligo ab wo i e nohnogi Jiosh wui k ha'akia ab wo ai mo he'ekia hab i ha elid g Jiosh

mat wo ha do'ibia. T g nahnko mahs hemajkam ab ep wo bei g ge'e ho'ige'idalg heg hekaj.

**Mat wo ha do'ibia g gawul mahs hemajkam g Jiosh**

<sup>13</sup>Dani kehshaj g Jesus Christ mant wo em-ahgi ahpim gawul mahs hemajkam g ha'ichu ahgaj. Kunt wo si ha'ichuch ihda ni-chikpan. <sup>14</sup>Tp hems g ni-wehm o'odham wo s-em-hehgam k ha'ijj wo e do'ibia. <sup>15</sup>Jiosh at ab i kuhpi'o g ap'edag am ha wehhejed g gawul mahs hemajkam mat hekid gam hu hab i ha juh g Tutuligo. T g gawul mahs hemajkam ba'ich wo i bei g ho'ige'idadag mat hekid am wo i e ai g tash mat g Tutuligo ab wo i e nohnogi Jiosh wui. Kut woho ab wo i e nohnogi wui.

<sup>16</sup>Neh, ab ach mamka g Jiosh g wehpegkamaj g ha'ichu t-gehgewa ch hab masma chehgid mo wehs d enigaj hegai t-gehgewa. Pegih, t-shohshon ahchim Tutuligo o d wehpegkam. K d si shel mat g ha-amjedkam mu'i ab wo i e nohnogi Jiosh wui. Uhs mahmhadag o d Jiosh eniga mamtp ab wo mah g tatkaj. T-shohshon o d tatk. Ch ahchim d mahmhadgaj.

<sup>17</sup>Mt wabshaba wo hikkumi'a hegam mahmhadgaj mat pi ab hu wo bahidagt k ab wo ha namki ab hegam mat wo s-kehg bahidagt. Pegih, t g Jiosh hab masma gam hu hab i ha juh hegam Tutuligo mo pi ab hu wohochud k ahpim em-ui gawul mahs hemajkam mamt ab i s-wohoch. Kum ab hahawa wehs ap'edag hegai mo haschu d i chum ha-ap'edag hegam Tutuligo mo

pi ab hu wohochud. <sup>18</sup>Mt pi wo e haschudad mat gam hu hab i ha juh. Jiosh at hab em-juh mamt hab haha wo masmak mam d Abrahambad amjedkam. Pi am d ha-shohshon ch wabsh heg wa wepo mam d mahmhadag.

<sup>19</sup>Mtp hems hab wo chei mat g mahmhadgaj e hikkumi'a mat am wo em-jegel. <sup>20</sup>T wabshaba hab wa e juh nat pi pi ab hu wohoch g Jiosh ha'ichu ahga. Mt ahpim ab s-wohochud k hekaj ab gi'is shonaj ab. Mt wabshaba pi wo si e haschudad id hekaj. <sup>21</sup>Gm at hu hab i ha juh g Jiosh hegam Tutuligo mo pi ab hu wohochud. Kumt ahpim gam hu hab ep wo i e juh mamtp pi ab hu wo wohochudad.

<sup>22</sup>Jiosh at wo si s-hemajimak ab em-wui mamtp ab wo s-wohochudad ch wabshaba ab em-wui wo kekiwua mamtp ab uhpam wo i e nohnogi pi ap'ekam wui. Pegih, ab g wo i oidahim ihda k an wo u'ukchid g Jiosh hemajimatalig. <sup>23</sup>Jiosh at ab uhpam ep wo ha ui hegam Tutuligo mat ab wo i s-wohoch. <sup>24</sup>Ab at em-ui ahpim gawul mahs o'odham. Kum wa chum pi e nahtokch. Id o wepo masma mamt wabsh chum hebai wo ha mul g i'ibhonig k ab wo namki g uhs e-e'es. Tutuligo o chum e nahtokch. T g Jiosh ab uhpam ep wo ha ui hegam mat ab wo i s-wohoch. Id o wepo masma mamt ab uhpam ep wo ha namki g ha-i'ibhonig am i ha mulink.

**Mash g Jiosh wehs s-ha  
ho'ige'id g hemajkam**

<sup>25</sup>Neh, ni-wepnag, hemu at ha'ichu mahsko wua g Jiosh. Kuni

id s-em-ahgidamk. Kumt wo s-mahchk ch hekaj pi hab wo chum ge e elidad mam si s-chu a'amichud. Pi at chum hekid im hu hab wo i e juhkch g Tutuligo ab amjed g Jiosh. Jiosh at mahsko wua mat ab wui wo i e nohnogi am i dahm mamt ahpim gawul mahs hemajkam ha'akia ab wui wo i e nohnogi mo he'ekia hab i em-elid g Jiosh. <sup>26</sup>T haha wo e do'ibia g Tutuligo. An o o'ohadag mo hab kaij g Jiosh:

Ab ant wo i wuhshad g  
hemajkam ha-do'ibiakam ab  
ha amjed g Tutuligo.

T heg gam hu hab wo i juh g pi  
ap ha-chu'ijig. *Isaiah 59:20-21*

<sup>27</sup>Neh, bat wa masma hab wo e  
juh g ha'ichu ni-ahga ab ha  
wui g Tutuligo. *Jeremiah 31:33*

<sup>28</sup>Ahchim Tutuligo ach d chum  
Jiosh hemajkamga nat pi ab i ha  
gawulkai g t-shohshon. T wabshaba  
mu'ijig g ni-wehm o'odham pi ab  
hu wohoch g Jiosh ha'ichu ahga  
k hab masma e obgach ab wui.  
K g Jiosh heg hekaj t-chehani  
matt am wo ahgachugad g s-kehg  
ha'ichu ahgaj em-wui ahpim gawul  
mahs hemajkam. <sup>29</sup>Pi at hekid  
am gawul wo juh g e-chegitoi  
g Jiosh. <sup>30</sup>Ahpim gawul mahs  
hemajkam am wa pi ab hu wohog  
elid g Jiosh. K wa g Jiosh pi ab  
hu em-ho'ige'id. T g Tutuligo gam  
hu i e nohnogi ab amjed g Jiosh.  
T g Jiosh heg hekaj ab em-mah g  
ho'ige'idadag. <sup>31</sup>K wabshaba ab  
him g tash mat hahawa em-wepo  
masma wo bei g Jiosh ho'ige'idadag  
g Tutuligo. <sup>32</sup>Wehs hemajkam o d  
pi ap chu'ijkam am Jiosh nena ed.  
Kut g Jiosh wehs ha wepo wo s-ha

ho'ige'el hegam mat ab wui wo i e nohnogi.

**Matsh g Paul ab si has el g Jiosh**

<sup>33</sup>Sho'o wa'i si ge'ej g Jiosh. K g ha'ichu amichudadaj ch ha'ichu mahchigaj sha'i si ge'ej. Pi at hedai wo sha'i e nako mas hejel wo s-mai g hab elidaj o wehs wo s-amich mo has masma hab wua ha'ichu. <sup>34</sup>Neh, bo chu'ig an Jiosh o'ohana ed:

Pi o hedai sha'i mahch g Jiosh chegitoi ch pi hedai wo e nako mas am wo ha'ichu i shelini g Jiosh.

<sup>35</sup>Wehs ha'ichu o d Jiosh eniga.

Kut pi hedai wo e nako mas ab wo ha'ichu mah.

*Isaiah 40:13-14*

<sup>36</sup>Wehs ha'ichu at an nahto. K wehs ha'ichu an hab chu'ig wehhejed. K hab mahs matt chum hekid ab wo si has elidad g Jiosh!

**Matt has wo masmak ch hab s-ap wo chikpandag g Jiosh**

**12** Pegih neh, ni-wepnag, si o s-t-ho'ige'id g Jiosh. Tt heg hekaj wehs am wo i t-dagito wui matt am wehhejed d wo dodakamk ch am hab wo junihid g tatchuij. Batt masma s-wohom ab has wo elidad g Jiosh. <sup>2</sup>Pi g am hu ha oidch hab wo masmak hegam mo pi ab hu ihm g Jiosh ch wabshaba ab wo i e dagito Jiosh wui. T heg am gawul wo juh g em-chegitoidag. T hab wehs wo i e wechijid g em-doakag. Bamt wa'i masma wo s-mahchk mo haschu d Jiosh tatchui. K heg d wa'i si hekia s-ap'ekam.

<sup>3</sup>Jiosh o ab s-ni-ho'ige'id ch ab ni-mah g gewkdag. Ni heg hekaj

hab em-ahg wehsijj mamt pi wo chum ge e ha'ichuchudad ch wo si s-mahchk mam haschu am chegito. Wehsijj amt am wo si i mamche mo he'es ab i em-mahkch g Jiosh g gewkdag ch haschu em-tatchuid mamt am hab wo junidad am oidch g e-wohochudadag. <sup>4</sup>Neh, no hig pi woho nahnko ha'ichu hab wua g o'odham chuhchu'idag, chum as d hemako g honshpadaj. <sup>5</sup>Pegih, tt hab wa masma nahnko ha'ichu wo junihid mat a'ai d wo i t-wehmtadagk ahchim mach ab t-hemakochudch g Christ wehm. <sup>6</sup>Am g wo hekaj g e-gewkdag a'ai e wehhejed hab masma mo g Jiosh am ap'echudch mamt hab wo e juh. Ha'i o ab em-mahkch g gewkdag mamt am wo ahgahid g ha'ichu ahgaj. Kumt ab wo s-wohochudad ch wo ahgahid. <sup>7</sup>Ha'i o d em-mahkigdag mamt ha'ichukaj wo i ha wehmtad g e-wehm wohochuddam o wo ha'ichu ha mashchamad <sup>8</sup>o ha'ichukaj ab wo i ha gewkemhunad. Ha'i o d em-mahkigdag mamt ab wo ha'ichu ha ho'idad g e-wehm wohochuddam. Am g s-ba'ama hab wo wuad ch s-ha ho'ige'id. Ha'i o d em-mahkigdag mamt d wo ha wanimeddamk. Kumt wo si chikpanad ch s-gewkam am hab wo junihid. Ha'i o d em-mahkigdag mamt wo s-ha ho'ige'id k wo i ha wehmt hegam mo e sho'igchud.

<sup>9</sup>Pi g hab wabsh wo s-e junimk mam ab pihk e elid hedai i ha wui ch wabshaba si s-wohom ab si pihk e elid ab ha wui. Pi g hab wo junihid g pi ap'ekam ab hedai i wui ch wabshaba g s-ap'ekam hab

wo wa'i junihid ab ha wui. <sup>10</sup>Ab g wo si ha tatchuad g e-wehm wohochuddam ch ab has wo ha elidad, chum as aigo pi ab hu has wo em-elidad. <sup>11</sup>Mt wo si chikpanad ch pi wo papadmak. Si e-ihbdagkaj amt ab wo ihmud g Christ ch wo chikpandad. <sup>12</sup>Mt wo si s-hehgigk heg hekaj mo haschu g Jiosh ab em-wuichud. Am g wabsh wo i s-dodolimak e-kudutadag ed ch chum hekid wo e ho'ige'idahunad. <sup>13</sup>Ha'i o e sho'igchud g t-wehm wohochuddam. K ab t-ab matt am wo i ha wahpki t-kihki ed k ab wo i ha mah g i wehmata, chum as d wabsh wo ge o'odhamk.

<sup>14</sup>Ab g wo i tahni g Jiosh mat ab wabsh wo i s-ha ho'ige'el hegam mo em-sho'igchud. Pi g wo sha'i has ha ahgad. <sup>15</sup>Ab g wo si ha wehm s-hehgigk hegam mo s-hehgig ch ha wehm pi ap e tahtk hegam mo pi ap e tahtk. <sup>16</sup>Am g wabsh s-ap e wehm wo kihkad. Pi g am wo chum e ha'ichuchudad ch ab wabsh wo ha tatchuad g sho'igkam ch am hab wabsh wo junihid wabsh chum has mahs chikpan. Pi amt hab wo e elidad mam d s-chu a'amichuddam.

<sup>17</sup>Am g hab wo junihid g s-ap'ekam wehs ha wui ch pi ab hu uhpam wo i nodagi g pi ap'ekam hegam ha wui mat ab em-wui hab wo juh g pi ap'ekam. <sup>18</sup>Am g wo i e nakog mamt s-ap e tahtk ch ab wo ha neidad g hemajkam mamtp he'es wo i e nako. <sup>19</sup>Pi g am wo hejel e agwuan. Jiosh at am hab wo wa em-juni. Neh, bo chu'ig an o'ohanaj ed g Jiosh:

Ahni o ab ni-ab mant  
em-wehhejed hab wo juh g  
agwuidag. *Deuteronomy 32:35*

<sup>20</sup>K hab ep chu'ig g o'ohanaj:

Mt wo gegos chum hems  
g e-obga matp d wo  
bihugimkamk.

Kutp d wo tonomkamk, mt wo  
wasibi g shuhdagi.

T hab masma am hejel wo  
i e chegito g em-obga.

*Proverbs 25:21-22*

<sup>21</sup>T wo t-gehg g pi ap'ekam mattp wo hejel t-agwua. Kutt wabshaba wo gehg g pi ap'ekam mattp ab wo namkid g s-ap'ekamkaj.

**Matt ab wo ha wechok g haha'ichu**

**13** Am o ap'echudch g Jiosh mat in wo ha'ichugk g kownaltalig ch am wo t-dahmk. Tt heg hekaj ab wo wechok g ha-chehanig g kokownal <sup>2</sup>ch pi wo melchkwuad. Jiosh o ab ha mahkch g gewkdag. Kut wo t-namkid matt wo sha melchkwuad. <sup>3</sup>Tt heg hekaj wo s-ehbidad g kownal matt hab wo sha junihid g pi ap'ekam ch wabshaba pi wo ehbidad mattp g s-ap'ekam hab wo junihid. Am g hab wo wa'i junihid g s-ap'ekam. T g haha'ichu s-ap wo em-elidad. <sup>4</sup>Jiosh at am i ha chuhcha g kokownal mat wo t-nuhkudad. Kut wo s-ta ehbidamk mattp hab wo junihid g pi ap'ekam no pi g Jiosh ab ha mahkch g gewkdag mat s-ko'okam wo t-namkid. <sup>5</sup>Hemho wa att wo himad g chehanig nach pi s-mahch mo pi ap'e matt wo melchkwua.

<sup>6</sup>Ab o d wuikamaj g kownal hegai mo haschu ab t-kowlant mat hekaj wo himad g e-chikpan. <sup>7</sup>Pegih, tt ab has wo ha elidad g haha'ichu k wo namkidad g kownal hegai mo haschu ab t-chehani.

**Matt has masma ab a'ai wo t-neidad**

<sup>8</sup>Pi att hedai wui wo chum t-wulshchid ch wabsh s-ap wo ha namkidad. Id att wa'i hekaj wo chum t-wulshchid matt ab a'ai t-hekaj wo si pihk t-elidad. Id o d Jiosh chehanig. Kuch ab s-wohog elid g chehanigaj ab a'ai si pihk t-elidch. <sup>9</sup>Bo chu'ig g chehanigaj: Pi g wo ha ehsid g ha-wehm kihkam. Pi g wo ha mua'i. Pi g ha'ichu wo ha ehsidad. Pi g wo pihk e elidad g s-kaisdagkaj. *Exodus 20:13-17* Neh wehs ihda o hab d ahga matt ab wo si pihk t-elidad wabsh chum hedai wui hab masma mach has i masma hejel pihk t-elid. <sup>10</sup>Pi att hekid am hab wo junihid g pi ap'ekam ab ha wui hegam mach ha hekaj si pihk t-elid. Neh, wehs ach am hab junihim g Jiosh chehanig mattp ab wo pihk t-elidad wabsh chum hedai wui.

<sup>11</sup>Id att hab wo wuad heg hekaj mat mehk wa'i hih g tash. E at ai matt ab wo si i t-nenenashanich no pi e aihim mat g Jiosh ab wo i t-wuwhas id amjed jewed. <sup>12</sup>Pegih, tt wo dagito g pi ap'ekam k g s-ap'ekam am hab wo junihid. E o aihim matt s-ap wo t-do'ibia. <sup>13</sup>Tt wo si t-elidad mattp wo ih'ed ch wo t-nondagch o attp wabsh chum hedai wehm wo wo'iwup o attp s-uam has wo t-wuad o attp wo s-ha hehgam o attp wo ha cheggia. Ab o t-ab matt am wo dagito hewai hab mahs ha'ichu k heg hab wo wa'i junihid mo d s-ap'ekam. <sup>14</sup>Do si t-kownalig g Jesus Christ. Kutt

ab wui wo i t-dagito matt pi am hu hab wo junihid g pi ap t-tatchui.

**Matt chum pi a'ai has wo t-ahgad**

**14** Ha'i atp hems am wabsh kia pi gewpkdag g em-wehm wohochuddam am e-wohochudadag ed. Kumt wabsh wo ha tatchuad ch pi wo ne'owi heg amjed mo haschu al i s-mahch. <sup>2</sup>Neh, am o wa s-ap'e matt wabsh chum haschu hugi wo ko'ad matp wo s-gewkdagk g t-wohochudadag. K wabshaba ha'i pi gewkdag e-wohochudadag ed ch heg hekaj hab e elid mo ha'ichu pi hiwigidas mat wo e ko'ad. <sup>3</sup>Kutt pi a'ai has wo t-eh'el heg hekaj mach haschu i ko'a nat pi g Jiosh ab i t-ui. <sup>4</sup>Pi o ab hu t-ab machs wo has ahgad g t-wehm wohochuddam. Do Jiosh pionag. Jiosh o d t-ahmo ch heg am wo i a'appe mas s-ap am hab e junihim g t-wehm wohochuddam. T wabsh wo e nako mat s-ap am hab wo junihid no pi g Jiosh am i wehmaj wehs ha'ichu k ed.

<sup>5</sup>Ha'i o hab e elid mat am wo oidad g Tutuligo ha-piapiast tash ch ha'i hab elid mo wehs tash am wabsh i e wepodag. Ab o hejel t-ab mattp has wo i elidad. <sup>6</sup>Matp hedai ab wo si has elidad hema tash ch hab e wua mat heg eda ab wo si i ihm g Jiosh. Tp hedai wabsh chum haschu wo ko'ad ch ab wo si has i elidad g Jiosh nat pi ab wo si i ho'ige'el heg hekaj ha'ichu hugi. Kutp hedai pi wabsh chum haschu wo ko'ad ch hab wa'ap wo si has elidad g Jiosh nat pi ab wo chum ho'ige'el g Jiosh heg hekaj mo haschu i ko'a k ab wo si has i el. <sup>7</sup>Pi

ach hedai wabsh hejel t-wehhejed in d doakam ch wabshaba Christ wehhejed in d doakam ch wo muh mat hekid hab wo i el g Jiosh.

<sup>8</sup>Pegih, dach Christ hemajkamga mach in d doakam ch hab wa'ap d enigaj chum achs hems wo muh.

<sup>9</sup>Christ at muh k ab uhpam i wuhsh muhkig amjed mat d wo t-kownaligk, chum achs hems wo muh. <sup>10</sup>Pegih, pi att am wo chum has ahgad g t-wehm wohochuddam.

Wehsijj att am wo i gegokiwua wui g Jiosh heg i eda lodaita tash.

<sup>11</sup>Neh, an o o'ohadag mo hab kajj g Jiosh:

Wehs at ab wo i shul g  
hemajkam ni-wui k ab  
wo ni-ihm mani d Jiosh.

*Isaiah 45:23*

<sup>12</sup>Wehsijj att hemho wa hehe'ejel am wo i kekiwua ba'ich matt wo ah g hejel hab t-juni.

**Pi ach tatchua hegai  
matt wo heki himch**

<sup>13</sup>Pegih, mt hig wo ha'asa a'ai has e ahgad. Id amt am hab wo elidad mamt pi am hu wabsh has wo e wuad. T hekaj pi wo heki hih g em-wehm wohochuddam o am wo gei pi ap'ekam ch ed. <sup>14</sup>Ab ach s-wohochud g t-kownalig Jesus ch hekaj chum s-mahch mo wehs g ha'ichu hugi hiwigidas matt wo huh. Tp wabshaba hema hab wo elidad mo pi hiwigidas, pegih, k pi ap'e mas an wo bei. <sup>15</sup>Kutp hems wo heki him k pi wo e do'ibia matp hema an wo hekaj hegai mo haschu hab elid mo pi hiwigidas. Pi ach tatchua g t-wehm wohochuddam mattp wo heki himch. T eda

g Christ wehhejed muh chum s-do'ibiamk. <sup>16</sup>Pi g am hu ha'ichu has wo juhni mamt heg hekaj wo has em-ahgad, chum ams hems hab elid mo d s-ap'ekam. <sup>17</sup>Pi o d si ha'ichu machs haschukaj wo t-gegosidad. K wabshaba id d si ha'ichu matt am hab wo junihid g s-ap'ekam ch ab a'ai t-wui wo si s-ap t-tahtkk ch wo si s-hehgigk mat g Hekia S-ap'ekam Gewkdag am i t-ap'ech Jiosh wui. <sup>18</sup>Pegih, tt hab wa masma am hab wo t-junihid am wehhejed g Christ. T g Jiosh ab wo si s-hohho'i ihda. T g hemajkam pi ha'ichu wo cheh mas ab wo t-abch.

**Matt ab a'ai wo i t-gewkemhunad  
ch pi wo heki t-hihimch**

<sup>19</sup>Tt heg wui am wo i t-nako matt haschukaj ab a'ai wo i t-gewkemhunad ch ab a'ai t-wui wo s-ap t-tahtkk. <sup>20</sup>Do Jiosh do'ibiakam g t-wehm wohochuddam. Pegih, pi g ha'ichu hab wo juhni mas hekaj wo heki hihi. Wehs ha'ichu hugi o hiwigidas. K wabshaba pi ap'e machs wo ko'ad matt haschukaj wo ha heki hihimch g t-wehm wohochuddam. <sup>21</sup>Kutt heg hekaj wabsh wo dagito hegai mattp haschukaj wo heki himch g t-wehm wohochuddam. Chuhkug attp hems wo dagito o g nawait o wabsh chum haschu. <sup>22</sup>Am att wabsh wo hejel nuhkudad mach haschu i s-wohochud id amjed ch heg wa'i Jiosh ab wo ahgi. Tt wo s-hehgigk mattp hab wo junihid hegai mach haschu i s-mahch mo s-ap'e. T hab pi wo heki hih g t-wehm wohochuddam. <sup>23</sup>Pi g am hu hab wo juhni hegai mam haschu



pi mahch mas d s-ap'ekam k hab pi  
ab hu wo e chu'ijigch heg hekaj.

**Matt pi wabsh hejel  
am wo t-chegitok**

**15** Pi att wabsh hejel am wo  
t-chegitod ahchim mach  
ab wabsh s-ap s-wohochud g Jiosh  
ch wabshaba ep wo ha chegitod  
hegam mo pi am hu i si s-amichud  
mo ha'ichu s-ap'e. <sup>2</sup>Kut heg hekaj  
ab wo i e gewkemhunad ch ba'ich  
wo i s-ap s-amich mo haschu s-ap'e.  
<sup>3</sup>Am o t-chehgidch g Christ matt pi  
wabsh hejel wo t-chegitok no pi pi  
wabsh hejel am hu e chegito mo wa  
in oimmed. An at o'oha g kelibad  
Jiosh ha'ichu i tashogiddam:

Jiosh si Kehsha at ab wo nako  
g has e-ahgadag ab ha amjed  
hegam mo ab wui gegok g  
Jiosh. *Psalms 69:2*

Kut wa woho hab e juh. <sup>4</sup>Wehs o  
d t-mashchamadag mat haschu an  
o'oha g kekelibad Jiosh ha'ichu  
i tashogiddam. Kutt heg ab ab  
wo i t-gewkemhunad ch hab s-ap  
t-tahtkk ch wo nenidad matt ab wo  
bei g t-ap'edag ab amjed g Jiosh.

<sup>5-6</sup>Do Jiosh mo ab i t-gewkemhun  
matt s-ap t-tahtkk ch wo nenida g  
t-ap'edag. Kuni ab tahni mat hab  
wo em-juh mamt am oidch hab wo  
e junihid g t-kownalig Jesus Christ  
k ch wehs e wehm ab wo ihm ad  
g ohgaj Jiosh ch hab s-ap wo e  
tahtkkad ab a'ai e wui.

**Mo ihda s-kehg ha'ichu  
ahga ab d ha-wuikam g  
nahenko mahs hemajkam**

<sup>7</sup>S-ap o ab t-neid g Christ. Kutt  
ahchim hab wa masma ab a'ai

s-ap wo t-neidad ch hab ab wo has  
elidad g Jiosh. <sup>8</sup>Chum o hekid am  
hab junihim g Jiosh mo has i kaij.  
T heg hekaj ia jiwia g Christ mat  
am hab wo t-juni ahchim Tutuligo  
hegai moki haschu g Jiosh ab ha  
ahgid g t-shohshonbad. <sup>9</sup>Kumt heg  
hekaj ab ep wo ihm g Jiosh ahpim  
gawul mahs hemajkam mat ab hab  
wa'ap s-em ho'ige'el. Neh, bo chu'ig  
an Jiosh o'ohana ed mo hema hab  
kaij am Jiosh wui:

Ab ant wo m-ho'ige'idad am  
ha shahgid g gawul mahs  
hemajkam ch ab wo si ne'ed  
ch ab wo m-ihmad ha wehm.

*Psalms 18:49*

<sup>10</sup>K an hab ep chu'ig:

Ahpim amt ep wo s-hehgigk  
gawul mahs hemajkam  
t-wehm ahchim Tutuligo.

*Deuteronomy 32:43*

<sup>11</sup>K an hab ep chu'ig:

Ab g wo ihm ad g Jiosh wehsijj  
ahpim gawul mahs hemajkam  
ch wo si hehgchulidad.

*Psalms 117:1*

<sup>12</sup>K an hab ep chu'ig mo hab kaij g  
Isaiaabad:

Ab at hema wo i wuhshani k  
wehs d wo ha-kownaligk g  
nahenko mahs hemajkam.

T hegam ab wo i s-wohoch.

Id at d wo amjedkamajk hegai  
mash d t-kokownaligbad  
ha-shohshon ch hab chehgig  
Jesse. *Isaiah 11:1,10*

<sup>13</sup>Jiosh at hab em-juh mamt  
wabsh wo nenidad matp haschu  
am hab wo i em-juni. Kuni ab  
tahni mat ab wo i gewkai g  
em-wohochudadag mamt hekaj wo  
si s-hehgigk ch wo si s-ap e tahtkk

ab wui. Bamt masma ba'ich i s-ap wo nenidad g e-ap'edag. T g Hekia S-ap'ekam Gewkdag ab ba'ich wo i em-mah g wohochudadag.

**Mat haschu ahgk g Paul am  
si s-gewkam ha o'ohani g  
e-wehm wohochuddam**

<sup>14</sup>Ni-wepnag, s-mahch ani mamtp hu hi wa i s-ap am hab e junihim ch mu'i ha'ichu s-mahch mamt s-ap a'ai wo e mashcha.

<sup>15</sup>Ni wabshaba id eda o'ohana si s-gewkam ha'ichu am em-ahgid mant am wo i em-chegitoich. Jiosh at ab has ni-elid k am i ni-kei <sup>16</sup>mant d wo piongajk g Jesus Christ em-wehhejed ahpim gawul mahs hemajkam. Am ani wehsko ahgachug g s-kehg ha'ichu ahgaj g Jiosh am ha wui g gawul mahs hemajkam. K heg hekaj ha ap'echudahim g Hekia S-ap'ekam Gewkdag. K ab ihm g Jiosh idam.

<sup>17</sup>Kuni si s-ap ni-tahtk ch chikpanid g Jiosh ahgachugch g ha'ichu ahgaj ab amjed g Jesus Christ. <sup>18</sup>Heg at am hab ha juh g gawul mahs hemajkam mat ab s-wohog el g Jiosh heg hekaj mani has i kaij ch has ni-wua. Kuni heg wa'i s-em-ahgidamk mat heg has e juh. <sup>19</sup>Hekia S-ap'ekam Gewkdag o ab ni-mahkch hegai gewkdag mani hekaj hab wua g s-hasis ha'ichu. K id am wohokamchud g ha'ichu ahgaj g Jiosh. Kunt am i ahgahi Jerusalem t amjed wehs jejewed ha oidch gam hu Illyricum (Albania) jewed hugkam. <sup>20</sup>Chum ani hekid hab ni-elid mant am wo i ahgahi ihda s-kehg ha'ichu ahga mo hebai pi koi sha'i kah g hemajkam ab

amjed g Christ k hab si wechij am wo i shonwuich. <sup>21</sup>Neh, bo d ahga ihda Jiosh o'ohana mo hab chu'ig:

T wo wa kah k wo s-amich hegam mat koi sha'i kah ab amjed hegai mat wo ha do'ibia. *Isaiah 52:15*

<sup>22</sup>Neh, mu'ikko o ni-shohbidch ihda chikpan nant pi pi koi nahto. Nt hab pi koi i em-chehgim.

**Matsh wa am wo i ha  
chehgim g Paul Rome wui**

<sup>23</sup>K wabshaba hemu pi am hu ha wi'is manis am hu wo ahgachugad g Jiosh ha'ichu ahga am ha oidch idam jejewed. Mu'i a'ahidag ani am chum s-em-chehgimelink <sup>24</sup>ch antp hu'i haha wo ni-nako hemuch am himadch Spain jewed wui nani pi am s-himimk. S-mahch ani hi wa mamt am wo i ni-wehmt mant am wo him k am he'es wo i em-neidchkahim ch s-ap wo ni-tahtkk.

<sup>25</sup>Nt wabshaba wehpeg gam hu wo hih Jerusalem wui k am ha'ichukaj wo i ha wehmt g t-wehm wohochuddam amai. <sup>26</sup>Si ash e sho'igichud g t-wehm wohochuddam Jerusalem t am. T hegam t-wehm wohochuddam mo am kih Macedonia ch Greece jejewed ch ed hab i e ah mat wo i hemapai g lial k hekaj wo i ha wehmt. <sup>27</sup>S-ap'e o mat am aigo wo i ha wehmt nat pi ab ha amjed i hih g s-kehg ha'ichu ahgaj g Jiosh. <sup>28</sup>Neh, am ant ha wehm wo hih hegam mat am wo i ui g ha-mahkgidag Jerusalem t am. Heg i dahm ant am haha wo i em-chehgim am himadch mant gam hu wo hih Spain wui. <sup>29</sup>S-mahch

ani matt ab a'ai wo si s-t-ho'ige'el mant am wo jiwia em-wui.

<sup>30</sup>Dam ni-wehm wohochuddam g t-kownalig Jesus Christ. K g Hekia S-ap'ekam Gewkdag ab em-mahkch g gewkdag mamt wo si pihk e elidad ha hekaj g e-wehm wohochuddam. Kuni heg hekaj ab em-tahni mamt ab wo si e sho'igch Jiosh wui <sup>31</sup>k ab wo tai mat wo si ni-nuhkudad. T hab pi has wo ni-juh hegam mo pi ab hu wohochud g Christ amai Judea ch ed. Ab g ep wo tahni g Jiosh mat am hab wo ha juh g t-wehm wohochuddam mat ab wabsh s-ap wo ui g t-mahkigdag. <sup>32</sup>Nt heg hekaj si s-ap ni-tahtk k am wo i em-chehgm matp hab wo elidad g Jiosh. <sup>33</sup>Jiosh o ab t-mahkch g s-ap tahhadkam. Ni ab tahni mat ab ba'ich wo i em-wehmt.

**Mash wa g Paul am ah'ad  
g e-ho'ige'idadag**

**16** Am atsh wo i em-chehgm ihda t-wehm wohochuddam mo hab chehgig Phebe ch am i ha wehmt g t-wehm wohochuddam Cencrea kihhim t am. <sup>2</sup>Mt s-ap ab wo i nei am wehhejed g t-kownalig Jesus. Ab o d t-wuikam matt ab wo i ha wahpki hegam mo an oiopod ch chikpan g Jiosh ha'ichu ahga. Ge'e ha'ichu o am hab junihim ihda Phebe mu'i t-wehhejed. Kumt am wo i wehmt heg hekaj mat haschu wo i tatchua.

<sup>3</sup>Am g wo ha ahgid g ni-machiga amai mat ab wo i s-ni-ho'ige'el. Kah ani mash am dadha g Priscilla ch Aquila. Idam o wa am ni-wehm chikpanahim <sup>4</sup>ch chum alo e

ko'ij ni-wehhejed. Kuni ab si s-ha ho'ige'id. K hegam gawul mahs hemajkam mo ab ni-ab kah g Jiosh ha'ichu ahga hab wa'ap ab s-ha ho'ige'id mat ni-do'ibia.

<sup>5</sup>Kah ani mash am ha'i e hehemapad ch e mihshmad ha-kih am idam Priscilla ch Aquila. Kumt am wo ha ahgi mat ab wo i s-ni-ho'ige'el.

Am g ep wo ahgid g ni-nawoj Epanetus mat ab wo i s-ni-ho'ige'el. Heg o wud mat si wehpeg ab i s-wohoch g s-kehg ha'ichu ahgaj g Jiosh amai Asia jewed ch ed.

<sup>6</sup>Sh am si i em-wehmt g ni-machiga Mary. Kumt am wo ahgi mat ab wo i s-ni-ho'ige'el.

<sup>7</sup>Sh g ni-hajuni Andronicus ch Junia am ep em-wehmaj. Idam at wa wehpeg ab i s-wohoch g s-kehg ha'ichu ahgaj g Jiosh. Nt ab hahawa i s-wohoch. S-ap o ahgachug g Jiosh ha'ichu ahga mo heg hekaj ab gawulkdas. Kum wa hab wa'ap ha kuhpchkahim. Am g wo ha ahgid mat ab wo i s-ni-ho'ige'el.

<sup>8</sup>Kush g Ampliatus am ep dak ch d si ni-nawoj am Christ himdag ed. <sup>9</sup>Sh am ep em-wehmaj hegai Urbanus mo wa am ni-wehm ahgachug g Jiosh ha'ichu ahga. Sh g Stacas am ep em-wehmaj ch d si ni-nawoj. <sup>10</sup>Sh g Apelles am ep em-wehmaj ch hab wa'ap e chehgidch mo am hab wa'ap ha'ichu hab junihim wehhejed g Christ. <sup>11</sup>Sh g Herodion am ep em-wehmaj ch d ni-hajuni. Idam g wo ha ahgid mat ab wo i s-ni-ho'ige'el.

Am g wo ha ahgid hegam Aristobulus ch hegam Narcissus mat ab wo i s-ni-ho'ige'el.

<sup>12</sup>Sh am ep em-wehmaj g Tripina ch Triposa ch am chikpan g Jiosh ha'ichu ahga. Sh g Persis am ep si chikpan. <sup>13</sup>Sh g Rufus g si ge'e chikpan am hab wa'ap junihim. Rufus je'e o hab masma ab ni-neid mani d madaj. Kumt wehs am wo ha ahgi idam mat ab wo s-ni-ho'ige'el.

<sup>14</sup>Sh am e wehm ab ihm g Jiosh hegam Asincritas ch Plegon ch Hermes ch Patrobas ch Hermas ch ha'i ehp. Kumt am wo ha ahgi mat ab wo i s-ni-ho'ige'el.

<sup>15</sup>Sh am e wehm ab ihm g Jiosh hegam Philologas ch Julia ch hegam Nerias g e-uwiga wehm ch Olimpas ch ha'i ehp. Kumt am wo ha ahgi mat ab wo i s-ni-ho'ige'el.

<sup>16</sup>Ab g wo e chehgid mam a'ai s-e ho'ige'elid. Wehsijj hegam mo an a'ai e nanmek ch ab ihm g Jesus Christ o ab s-em-ho'ige'id.

**Id o d si oidch ha'ichu i ha shelina ab amjed g Paul**

<sup>17</sup>Neh, am ant ha'ichu wo em-ahgi, ni-wepnag. An o ha'i oiopod ch am gawul junihim g Jiosh ha'ichu ahga ch am ha'ichu hab ahg mat hekaj wo e kudu g t-wehm wohochuddam k ab e wui wo gegokiwua. Kumt wo si s-e nen'oidk ab ha amjed k pi ab hu wo i ha miabi. <sup>18</sup>Idam o wabsh hejel e wehhejed hab wua g pi ap e-tatchui ch pi ab hu chikpanid g t-kownalig Jesus Christ. Ho o iattogid hegam mo pi ap mahch g wohokam wabsh si s-kehg neneokch ch s-ap has ha ahg.

<sup>19</sup>Kumsh eda ahpim ab si s-wohog elid g s-kehg ha'ichu ahga ab amjed g Christ. Kuni heg hekaj

ab si s-hehgid em-hekaj ch am s-em-ahgidamk mamt wo s-ap s-mahchk g s-ap'ekam ch pi wo mahchk g pi ap'ekam. <sup>20</sup>Jiosh o ab t-mahkch g s-ap tahhadkam ch s-hohtam wo em-mah g gewkdag mamt wo gewito g Jiawul.

Ab ani tahni g t-kownalig Jesus mat wo em-wehmajk ch ba'ich ab wo i em-mah g ho'ige'idadag.

**Mash ab s-ha ho'ige'id hegam mash am wehmaj g Paul**

<sup>21</sup>Ia o ni-wehm chikpan g Timothy ch hab kaj mamtsh ab wo i s-ho'ige'el. K idam ab s-em-ho'ige'id ni-wehm o'odham mo hab chehgid Lucius ch Jason ch Sosipater.

<sup>22</sup>Ia o ni-wehhejed em-o'ohanid ihda g Tershus ch hab ep kaj mamtsh ab wo i s-ho'ige'el.

<sup>23</sup>Ia ani da kihj am g Gaius. K id ab ep s-em-ho'ige'id. Ia kihj am o e nanmek g Christ wohochuddam. Hegai mo d lial nuhkuddam am wehhejed g kownal id eda kihhim o hab chehgid Erastus ch ab s-wohochud g Jiosh ch hab wa'ap am em-ho'ige'elid. K g Quartus hab wa'ap am em-ho'ige'elid. [<sup>24</sup>Neh, ab at wo wa ba'ich i s-em-ho'ige'el g t-kownalig Jesus Christ.]

**Mat ab si ihm g Jiosh g Paul k am i kuhgi g e-o'ohana**

<sup>25</sup>Nt am haha wo i em-dagito Jiosh wui. Heg at wo e nako mat wo i em-gewpkai. Mt hahawa s-wihnam ab wo s-wohochudag g Jiosh ha'ichu ahga. Heg ani hekaj ahgachug ihda s-kehg ha'ichu ahgaj ab amjed g Jesus Christ. Kekelibad

Jiosh ha'ichu i tashogiddam at  
 wa heki hu an o'oha ihda s-kehg  
 ha'ichu ahgaj ab amjed g Jesus  
 Christ. <sup>26</sup>T g Jiosh hemu mahsko  
 wua mo has d ahga k am tashogi  
 mat am wo e ahgahid wehs ha wui  
 g nahnko mahs hemajkam matp  
 hems ab wo i s-wohochud k ab wo  
 s-wohog i el.

Pi o hebai ha hug g Jiosh <sup>27</sup>ch  
 wehs ha'ichu s-mahch ch ab i e  
 maskogid am gahi wuhshanim  
 g Jesus Christ. Kutt heg gahi  
 wuhshanim ab wo si ihmud g  
 Jiosh ch ab wo si has elidad chum  
 hekid.

Neh, id ant am wo wa'i  
 em-o'ohani.